

**Medica sacra: sive, de morbis insignioribvs qvi in Bibliis memorantvr  
commentarijs / Avctore Richardo Mead.**

**Contributors**

Mead, Richard, 1673-1754

Norfolk, Bernard Edward Howard, Duke of, 1765-1842

Burder, Thomas Harrison, 1789-1843

**Publication/Creation**

Londini : Prostant apud Joannem Brindley ..., 1749.

**Persistent URL**

<https://wellcomecollection.org/works/wrfqazqk>


**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>






36145/B/1

Case E  
Shelf 6

B.x1

18/m




LEEDS.









Digitized by the Internet Archive  
in 2019 with funding from  
Wellcome Library



*From the Author*



M E D I C A  
S A C R A.





MEDICA SACRA

MORBIS

INTEGNOMIBVS

MR F B L S

COMMENTARIVS

AVTHOR


AVTHOR

AVTHOR

AVTHOR

MEDICA SACRA:  
SIVE, DE  
MORBIS  
INSIGNIORIBVS,  
QVI IN  
BIBLIIS  
MEMORANTVR,  
COMMENTARIVS.

AVCTORE  
RICHARDO MEAD,  
Colleg. Medicor. Londin. et Edinburg. Socio,  
Reg. Societat. Sodali, et Medico Regio.



LONDINI,  
Prostant apud JOANNEM BRINDLEY,  
Celfiff. Walliae Principis Bibliopolam,  
in vico dicto *New Bond Street*.  
MDCCXLIX.



MEDICAL SACRA

FIVE DE

MEMORIALS

INSIGNIORUM

QUIN

BIBLIS

MEMORANTIA

COMMENTARII



CHURCHILL

10, BEDFORD SQUARE, LONDON, W.C.1

PRINTED BY

JOHN JOHNSON, ST. PAUL'S CHURCH-YARD

LONDON

1881

IN TWO VOLUMES

Vol. I.



## PRAEFATIO.

CUM aetas ingravescens  
 missionem jam fere mihi  
 dederit a medicis laboribus, in  
 quibus bono publico, uti sal-  
 tem spero, quinquaginta cir-  
 citer annos memet exercui;  
 tantillum, quod mihi restare  
 poterit, in vita temporis ita  
 in otio transfigere decrevi, ut  
 nec mihi gravis, nec aliis in-  
 utilis videar. Otii enim sui e-  
 tiam reddendam esse rationem  
 a viri



viri boni putant, et id semper honestum esse volunt.

A PRIMA pueritia literarum amore captus, postquam ad artem medendi animum appuleram, nunquam tamen intermisi doctrinae studia, assiduorum negotiorum taedium hisce oblectamentis, quasi curarum dulcibus alloquiis, subinde levans. Inter haec dum Scripta Sacra, ut hominem Christianum decet, frequentius evolvi, secundum ea, quae ad vitam aeternam et pietatis praecepta spectant, historias morborum et variarum aegritudinum, quae in  
I illis



illis traduntur, in primis perpendere solebam; has cum iis conferens, quae aut ex libris medicorum, aut propria experientia didiceram. Et id quidem eo feci libentius, quod animadverteram theologos super his, rerum medicarum incitia, saepe in diversas sententias abire; praesertim cum daemoniaci, Jesu Christi, Servatoris nostri, potentia sanati, quae stioni locum praebeant. Hos enim multi revera a daemonibus obsessos fuisse volunt, et in illis expellendis quam maxime eluxisse divinam ejus virtutem. Mihi profecto longe alia mens est, quam ut do-



Œtrinae Christianae fundamenta diruere; aut prava Oraculorum Sacrorum interpretatione Dei Filium divinitate sua, tot tantisque operibus contra naturae leges peractis comprobata, privare studeam. Erroris autem patrociniis non indiget veritas, uti nec vultus natura nitidus fucum requirit. Et certum est opinionem istam, quae jam per multa saecula invaluit, de potentia ad corpora mentesque humanas vexandas daemonibus adhuc permessa, variis astutorum hominum praestigiis, cum maximo rei Christianae damno et opprobrio, ansam praebuisse.

QVIS



QVIS non merito irridet solennes istos Romae pontificum ritus, quibus exorcizantur, ut loqui amant, daemoniaci; dum homines gestus quosdam et furores, quales a malis geniis provenire putantur, simulare docti, aqua lustrali et precibus quibusdam, quasi incantamentis, sui compotes fieri, et a cacodaemonibus liberari sese fingant? Verum istae praestigiae, quantumvis oculis et mentibus ignarae plebis illudant; paulo tamen sagaciores non modo offendunt, sed et revera ipsis nocent. Hi enim, dolo perspecto, ad impietatem prona ducuntur;



ducuntur; et omnia sacra eodem loco habentes, postquam didicerint

*Religionibus atque minis ob-*  
*sistere vatam*<sup>1</sup>,

plus ultra pergunt, et ausu nefando omnem Supremi Numinis sensum, ac metum, ex animis suis radicitus evellere fatagunt. Qua in re haud aliter faciunt, ac si quis de Indis, an revera sint, eo dubitare velit, quod multa de iis ficta et falsa a peregrinantibus narrentur. Hinc evenit, ut apud gentes nimis superstitionibus deditas plurimi occurrant

<sup>1</sup> *Lucret. Lib. i. ver. 110.*

athei,



athei, etiam inter literatos; quos hoc mentis errore doctrina, et rerum scientia, immunes praestare debuit. Hac igitur stultitia caruisse sapientia prima est; huic proxima, res veras opinionum commentis non contaminare.

ET saepe quidem mirari soleo, cur fidei nostrae antistites daemonas in scenam producere tantopere contendant, quo scilicet divinum Christi numen de victis hisce infernis hostibus triumphos agat. An divinam Christi virtutem gravissimorum morborum sanationes, jussu illius momento tem-



temporis peractae, minus patefaciunt; quam malorum geniorum ex hominum corporibus expulsiões? Omnia profecto miracula in humani generis commodum ab illo facta, dum caecis visum dedit, nervis resolutis robur, contractis flexilitatem suam reddidit, mortuos in vitam revocavit, elementorum proprietates aliis mutavit, et caetera id genus opera, mundi Conditoris omnipotentiam testata sunt, praesentemque Deum demonstrarunt; qui solus universae naturae imperat, et fixum a se rerum ordinem pro arbitrio immutat et invertit. Qui haec  
igitur



igitur praestitit, quin daemona-  
nas etiam, ne benignum ejus  
propositum in Patris voluntate  
hominibus declaranda, pra-  
visque eorum moribus corri-  
gendis, impedirent, subjectos  
sibi habuerit, nemo certe du-  
bitare potest.

VT redeam autem ad dae-  
moniacos, non mea est profe-  
cto, sed aliorum ante me pie-  
tate et doctrina praestantium  
virorum sententia, quam hic  
propono. Et proximo quidem  
saeculo inter nostrates etiam  
Josephus Meadus, theologus  
rerum sacrarum cognitione  
nulli secundus, luculenta Dis-  
b      fertatione



sertatione eam propugnavit<sup>r</sup>. Cum ex eadem igitur ac ille familia, quod honori mihi duco, sim oriundus; patreque etiam Matthaeo Meado, summo theologo, natus: studia haec, jure quasi gentilitio, me quodammodo vindicare posse semper existimavi.

NON sum autem nescius, quam sit res ardua communes errores, illos in primis, qui ad religiones spectant, depellere. Novimus enim omnes, quantam vim ad mentem opinionibus imbuendam prima vitae habeat institutio; quas adulta

<sup>r</sup> *Works of Jos. Mede, Lond. 1677, Disc. 6.*



jam aetate delere est difficile. Pueri in tenebris nocturnos lemures et larvas metuunt, hinc per omnem saepe vitam eadem formidine trepidant. Cur ergo miramur, si falsa quaedam dediscere, atque animis excutere, etiam senescentes aegre possimus? Neque parvi fane momenti hanc rem esse is existimabit, qui secum reputet, in quam seria mala levia haec, utpote puerorum tantum et muliercularum terriculamenta, ut nonnullis videantur, haud raro ducunt. Horret enim animus meminisse, quot hominum innocentium myriadas post Christi

b 2            stum



stum natum varias apud gentes flammis damnaverit veneficiorum suspicio: dum ipsi forsan iudices, aut vanis opinionibus caecarentur; aut ab irata plebe sibi metuerent, si, quos illa reos praejudicaverat, sententiis suis absolvissent. Equis credat quenquam sanae mentis voluisse, id sibi lauducere, quod nongentos circiter veneficii reos, intra annos quindecim, in unica Lotharingiae provincia, ipse capitis damnaffet<sup>1</sup>? Et tamen ex permultis, quas idem narravit, historiis illorum, qui poenas dederunt, manifestis-

<sup>1</sup> Vid. *Nic. Remigii Daemonolatreiam.*



sime apparet eos omnes non, ut ipsi imaginabantur, cum daemonibus pacta habuisse, sed revera fuisse mente captos; adeo ut palam confiterentur ea se facinora perpetrasse, quae ipsa rerum natura fieri non patitur. Sed ita fit, ut error superstitionem, superstitio faevitiam plerumque pariat. Magno igitur gaudio afficior, quod jam ab aliquot annis leges de sagis et veneficis morte plectendis apud nos prorsus sint abolitae; quum barbaram hanc crudelitatem exteriadhuc retinent, eoque pertinacius, quo minus rerum veras causas intelligant. Et certum



tum est profecto ita a vulgo accipi doctrinam de daemonibus, quasi pro numine quodam habendus sit diabolus; aut saltem, seposito illius metu, nullus satis constare possit cultus divinus: cum tamen diserte dixerit Apostolus, *Ideo patefactum esse Dei Filium, ut diaboli opera aboleret*<sup>1</sup>.

ATTAMEN non ab re erit lectorem semel admonere, interpretationem *Biblicorum* a Sebastiano Castalione factam me ubique fere adhibuisse; quippe quam, habita multis in locis collatione, non modo

<sup>1</sup> *Johan. Epist. i. Cap. iii. ver. 8.*



Latinissimam, sed etiam accuratissimam, et ad sensum mentemque dictorum, tam in Hebraeis quam Graecis, maxime accommodatam deprehendi.

ΒΕΒΗΛΟΙΣ autem haec non scripsi; sed iis tantum, qui aut sacris theologicis, aut medicis, initiati sint et eruditi. Eaque de causa Latino potissimum sermone in lucem edere placuit; quem per multa jam saecula docti homines ad ea inter se communicanda, quae aut nova, aut praeter vulgarem opinionem dicta videntur, ubique fere adhibuerunt. Si quis igitur libri hujusce Anglicam



glicam versionem suscipiat, non tantum, me invito, id se facturum sciat; sed etiam contra jus illud aequabile, quo de re sua, prout libeat, statuere unicuique conceditur.

SED ut finem praefandi faciam, fidem Christianam ab omnibus suis cultoribus id in primis exigere liquet, ut quaevis humanitatis ac benevolentiae officia sibi invicem praestent. Quapropter omnino cavendum est, ne tam benefica animi affectio modis quibuscumque corrumpatur; quod opiniones de bonitate divina minus consentaneae maxime faciunt.

Proinde,



Proinde, cum ea sit temporum  
nostrorum calamitas, ut non  
tantum licitum, sed et lauda-  
bile multis habeatur, fidem et  
auctoritatem Christianae reli-  
gionis oppugnare, modisque  
omnibus elevare; nulli mira-  
bilium narrationum explica-  
tus, modo sint verisimiles, re-  
rumque, de quibus agitur, na-  
turae conveniant, intempestivi  
cenferi debent.

CAETERVM non in animo habui singulos morbos, qui in Sacris Literis occurrunt, describere: sed illos praefertim, quorum natura vulgo minus cognita videbatur, vel saltem con-



tra quos singularem aliquam medicinam ipse proponendam haberem; idque eodem ordine, quo illic traduntur, Jobi calamitate solum excepta, cui ob summam antiquitatem primum tribui locum. Multa autem tam corporis quam animi mala, praeter ea, de quibus hic meminerim, ut divinam suam virtutem hominibus manifestam faceret, sanavit ὁ τῷ κόσμῳ Σωτὴρ; quorum omnium naturam et causas si quis scrutari vellet, rei medicae corpus necesse esset conscribere, quod quidem non praesentis erat instituti. Olim fortasse, nisi mihi

*Fri-*



*Frigidus obstiterit circum prae-  
cordia sanguis,*

plura ad hanc rem spectantia,  
reipublicae medicae causa, in  
medium proferre non pigebit.  
Tu interim, Lector, haec can-  
dide accipias. Mihi autem fa-  
tis erit bene collocatae operae,  
rectique animi conscientia frui.  
Vale.





# CAPITVM

## ARGVMENTA.

CAP.	PAG.
I. <i>Jobi morbus.</i>	I
II. <i>Lepra morbus.</i>	II
III. <i>Regis Sauli morbus.</i>	25
IV. <i>Jorami regis morbus.</i>	30
V. <i>Ezechieae regis morbus.</i>	32
VI. <i>Senectus morbus.</i>	34
VII. <i>Nabuchodonosoris regis morbus.</i>	51
VIII. <i>Paralysis.</i>	55
IX. <i>De daemoniis.</i>	65
X. <i>De lunaticis.</i>	82
XI. <i>San-</i>	



Capitum argumenta.

CAP.	PAG.
XI. <i>Sanguinis muliebris proflu- vium.</i>	91
XII. <i>Debilitas dorsi cum spina ri- gida.</i>	92
XIII. <i>Christi sanguineus sudor.</i>	94
XIV. <i>Morbus Judae.</i>	96
XV. <i>Regis Herodis morbus.</i>	101



MEDICA

Πάντα δοκιμάζει· τὸ καλὸν κατέχει.  
*D. Paul. 1 Ep. ad Thessal. v. 21.*





# M E D I C A

## S A C R A.

### C A P V T I.

#### *Jobi morbus.*

**M**EMORABILEM faciunt Jobi morbum res nonnullae praeter solitum circumstantes et consequentes; cujusmodi sunt viri dignitas, subitanea status immutatio, res supra modum adversae, incredibilis in his patientia, restitutio in felicitatem priori longe majorem, aegritudinis denique, qua percitus fuit, singularis natura.

SEDEM is habuit in regione Hufa,  
quam in Arabiae Desertae parte septen-

B

tenti-



tentrionali, versus Euphratem et Mesopotamiam, collocatam fuisse censet eruditissimus Fridericus Spanhemius<sup>1</sup>. Vir admodum fuit illustris, omnium orientalium locupletissimus, filiis filiabusque beatissimus, vitae integerrimus, et cultus Dei observantissimus. Ad probandam autem integritatem ejus, ut Satanas illum modis omnibus, salva tamen ipsius vita, affligeret, Jova permisisse dicitur. “ Hic itaque dirissimas illi  
 “ calamitates intulit; captis primum a Sabaeis bobus omnibus, et  
 “ asinis; deinde balantibus et servis, lapso de caelo fulmine, incensis; camelis abactis; filiis filiabusque a vento in domum, in qua epulabantur, impingente, ea collapsa, mortuis; affecto denique  
 “ scabie foedisque ulceribus toto ipsius corpore, ita ut, sumpta testa,  
 “ sedens in medio pulvere sese sca-

<sup>1</sup> *Histcr. Jobi, Cap. iv.*

“ beret.”



“beret.” Hinc ex ditissimo pauperrimus, ex fortunatissimo miserimus evasit. Neque tamen haec omnia mala illum ab animi sui constantia, et pietate erga Deum, vel minimum dimoverunt<sup>1</sup>; quapropter Jova ab eo supplicante exoratus calamitatem omnem depulit, omnia, quae habuerat, conduplicavit, et fortunatiorem fecit, quam fuerat antea<sup>2</sup>.

ANTIQUISSIMVS autem omnium, quos quidem extitisse novimus, jure merito censeatur liber Jobi; quem nonnulli etiam patriarcharum temporibus, plurimi circa Mosis aetatem, et quidem ab ipso Mose, pauci post illum scriptum esse volunt<sup>3</sup>. Mihi vero perplacet doctissimi Lightfooti conjectura, qui illum ab

<sup>1</sup> Vide *Jobi Cap. i* | more suo differentem  
*et ii.* | laudatum Spanhemi-

<sup>2</sup> *Ibid. Cap. xlii.* | um, *Lib. citat. Capite*  
Lege de his docte | *viii et ix.*



ipso Elihu, collocutorum uno, confectum esse opinatur; hac praecipue ratione adductus, quod hic vir de se, ceu historiae hujus scriptore, loquitur<sup>1</sup>. Id si ita sit, ante Mosisaetatem exaratus fuisse videbitur. Caeterum utcunque haec se habeant, manifesta summae vetustatis librum hunc prae se ferre indicia certissimum est; ex quibus, quae maximi momenti esse videntur, hic breviter attingam. Nusquam in eo de exitu Israëlitarum ex Aegypto, de Mose, aut lege Mosaica, quidquam dicitur. Patriarcharum more, tanquam familiae princeps, privatis in aedibus pro peccatis liberorum suorum expiandis hostias Jobus immolabat<sup>2</sup>. Cum integritatem suam declararet, illius fere solum idololatriae memin- nit, quae fuerat antiquissima, solis nimirum lunaeque cultus<sup>3</sup>; quem

<sup>1</sup> *Oper. Tom. i. p. 24.*

<sup>2</sup> *Job. Cap. i. v. 5.*

<sup>3</sup> *Ibid. Cap. xxxi. v. 26, 27.*

apud



apud vicinos Chaldaeos et Phoenices primum obtinuisse, et vetustissimum fuisse scimus. Aetas denique ipsius longe supra eam provecta, quae Mosis tempore statuta fuit mortalibus, fidem facit antiquitatis. Vixit enim a tempore restitutionis suae annos centum quadraginta, ita ut ad annos plus quam ducentos vitam protraxisse facile credi possit. Seniores enim fuisse, cum calamitates eum oppresserunt, inde colligere licet; quod, quanquam senes dicantur tres ipsius amici<sup>\*</sup>, ipse tamen inter argumentandum nullum, ut Elihu, ob aetatem honorem iis deferre videtur. Ne longior sim, cum Spanhemio statuendum censeo, Jobi tempora incidisse in servitum Ibraëliticam in Aegypto, ita ut neque posteriora populi illius ἐξόδῳ, neque εἰσόδῳ anteriora fuerint.

\* *Job. Cap. xxxii. v. 6.*



DISPUTANT autem gravissimi auctores, fabula sit, an vera historia, haec narratio. Si mihi sententiam meam hic interponere liceret, dicerem non παραβολήν per ὑποτύπωσιν fictam, sed ex vera historia concinnatum esse dramaticum poëma; et eum fortasse in finem, ut exemplo viri illustris et integritate clari, afflicti tamen et miserrimi, omnia ista mala, quae in captivitate sua Aegyptiaca perpetiebatur populus Israëliticus, aequo animo ferre condisceret. Metricum sane esse hunc librum, pariter ac Davidis *Psalms*, *Proverbia*, *Ecclesiasten*, *Canticum Canticorum*, confessâ res est. Personae autem in scenam productae et interloquentes sunt, Deus, Satanas, Jobus, cum uxore, tres ipsius amici, et Elihu. *Est ergo*, inquit Hugo Grotius, *res vere gesta, sed poëtice tractata*'. Antiquissimum certe scri-

' *In loc.*

bendi



bendi genus erat poësis, et historias veras suo modo ornare solebant poëtae, ut in vetustissimis apud Graecos et Romanos videmus. Et inter Hebraeos quoque longe post haec tempora Ezechiel historiam educationis ex Aegypto carmine dramatico complexus est, unde *Judaicarum tragoediarum poëta* a Clemente Alexandrino appellatur<sup>1</sup>. Neque sane, ut mea fert opinio, styli sublimitate et elegantia, sermonum gravitate et sapientia, rerum naturae descriptionibus, morum denique singulis personis convenientium proprietate (quae quidem omnia sunt in fabula maximi momenti) quidquam in hoc scribendi genere potest esse admirabilius, et ad animos commovendos accommodatius.

<sup>1</sup> Ὁ τῶν Ἰσραηλιτῶν τετρα- | *Lib. i. p. 414. ed. Oxon.*  
 γωνιδίων ποιητής. *Stromat.* | 1715.



*Quo propius stes,  
Te capiet magis.*

SED finem hisce imponam, postquam de viri hujus illustris morbo conjecturam fecero. Illud autem in antecessum observare convenit, non Jobum, aut Jobi amicos; sed ipsum libri hujus auctorem, calamitatem hanc Satanae acceptam referre. Mundum nempe Supremi Numinis providentia regi, et sicut angeli sancti, quorum ministerio in largiendis beneficiis suis Deus utitur, ipsius imperio omnia procurant; ita Satanam ipsum cum ministris suis sub Dei potestate esse, neque sine permissu divino quaevis mala hominibus infligere posse, egregio exemplo ostendere voluit. Hinc cum *angeli convenirent, et apud Jovam astarent, Satanas una cum iis adesse* dicitur. *Astare* autem, ut observat rabbi Moses



ses Majemonides<sup>1</sup>, est accingi ad mandata Jovae accipienda ; Satanass vero injussus, et sponte sua, se illis immiscuit.

VERVNTAMEN quod ad morbum attinet, cutis vitium fuisse liquet. Certum est autem, ut foedis in summa pelle ulcerationibus ab omni aevo quam maxime patuerunt Hebraeorum corpora, unde carnis suillae esu illis interdictum fuisse putant eruditi (quippe quae crassum, et aegre perspirabile, nutrimentum sanguini subministrans istiusmodi corporis constitutionibus minime convenit) ita eo gravius saeviisse haec incommoda, quo calidiores regiones incolebantur, qualis est Arabia Deserta. Atque ob hanc causam auctores exteri, quibus despectui et invisus erat populus Judaeus, illum ex Aegypto pulsum fuisse tradunt; ni-

<sup>1</sup> *More Nevochim, Par. iii. Cap. xxii.*



mirum ne scabies et vitiligo, morbus illis communis, lepraque dictus, ad plures serperet<sup>1</sup>. At vero alius est morbus isto longe deterior, in Aegypto adeo frequens, ut illic vernaculus esse dicatur<sup>2</sup>, qui in torrida hac terra etiam nasci facile potuit, elephantiam intelligo. Is, leprae fere congener, viri hujus integerrimi corpus forsitan corruperat, de quo in capite proxime sequenti plura dicemus.

Ad summam igitur Deus, beneficus semper et misericors, cultoris sui constantiam animi, et patientiam in adversis, auctis in immensum ejus facultatibus, cum felicitis etiam familiae incremento, tandem remuneravit.

<sup>1</sup> *Justin. Hist. Lib. xxxvi. C. 2. et Tacit. Hist. Lib. v. ab initio.*

<sup>2</sup> *Lucret. Lib. vi. §*

1112.

*Est elephas morbus, qui propter flumina Nili Gignitur Aegypto in media.*





## CAPVT II.

*Lepra morbus.*

**A**TROCISIMVS erat, qui Judaeorum corpora frequenter foedabat morbus, lepra dictus. Ejus signa in sacris literis exposita hujusmodi erant<sup>1</sup>. “ In cute oriebantur  
“ papulae; pili in album colorem  
“ mutabantur; affectus facies cute  
“ erat depressior; cum morbus inveteraverat, tumor albus fiebat in  
“ cute, cui inerat caro viva; crescebat indies haec labes, et per  
“ corpus serpebat.” Proinde non tantum corpora, sed et “ vestes,  
“ imo (quod mirum videatur) utensilia pellicea, quin et ipsos aedium parietes, occupare dicitur hoc

<sup>1</sup> Vid. *Levitic. Cap. xiii et xiv.*



“malum.” Idcirco de his etiam purificandis praecepta traduntur.

DE contagione hujus morbi dis-  
sentiunt auctores medici. Et, quo-  
niam de tam pestifera illius vi, quae  
vestes atque aedium parietes occu-  
pare posset, nec Arabes nec Graeci  
medici, qui multa de illo scripse-  
runt, memoriae aliquid tradiderint;  
num ea, quae Judaeos infestabat, a  
communi lepra diversa plane fue-  
rit, disputant doctores Hebraei; om-  
nesque affirmant, *nunquam in uni-  
verso mundo inventam esse lepram  
vestium et domorum, nisi in sola Ju-  
daea, et solo populo Israëlitico*<sup>1</sup>.

Ego super hac re, quae veri mihi  
simillima videntur, proponam. Con-  
tagium aliud alio est subtilius. Est  
enim, quod halitu solo in corpus  
recipitur; quale in peste, variolis,  
aliisque febribus malignis, observa-

<sup>1</sup> Leg. Critic. Sacr. ad Levit. Cap. xiii.



mus. Est etiam, quod non nisi tactu contaminat; aut interno, ut luis venereae virus; aut externo, ut scabiei noxa, quae pannorum laneorum vel linteorum fricatione immittitur. Potuit ergo lepra, quae scabiei species est, hoc modo in hominem sanum transire. Fortasse etiam vitae consuetudine, pariter ac tabem, *contagiosam esse, et convictu cum phthisico contrahi, corruptis putrefactisque pituitis in pulmonem hominis sani delabentibus*, notavit Fracastorius<sup>1</sup>. Neque aliter de elephantia, leprae congeneri morbo, sententiam dicit Aretaeus; qui *cum morbo hoc affectis versari atque vitam agere, non minus, quam cum pestilentia contaminatis, metuendum esse* monet; contagionem enim per inspiratum aërem communicari<sup>2</sup>.

<sup>1</sup> De morbis contagiosis, Lib. ii. Cap. ix. | rum morborum, et de  
curationibus eorundem,  
<sup>2</sup> De causis diuturno- | Lib. ii. Cap. xiii.



AT nodus difficilis hic solvendus est. Dicit enim Moses, *Si in leprae affectu animadvertatur tumor albus in cute, factaque sit pilorum in illa in album mutatio, et insit in cute caro viva; lepram esse in corporis cute inveteratam. Sin autem lepra effluerit in cute, et totam morbidam cutem a capite ad pedes occupaverit; tumor morbidus purus judicandus erit*<sup>1</sup>. Manifestum est igitur, ut opinor, duas hic designari morbi hujusce species; unam, in qua cutis erosa exulcerabatur, ita ut caro viva subtus appareret; alteram, quae in summa cute tantum efflorescebat, quae et ipsa quasi squamis quibusdam exasperabatur. Ab isto igitur discrimine evenit, ut ille morbus contagiosus esset, hic non item. Squamae enim furfuris instar, aridae et leves, in cutem non penetrant; at materia purulenta, ex ulceribus ejus effluens,

<sup>1</sup> *Levit. Cap. xiii. § 10, etc.*



corpus summum corrumpit. Sed de morborum differentiis, qui cutem foedant, operae pretium erit legere, quae congeffit vir rei medicae et linguae Romanae studiosissimus, Joannes Manardus<sup>1</sup>.

Nullo non tempore notus fuit hic morbus; saevior vero semper erat in Syria et Aegypto, utpote regionibus calidioribus, quam in Graecia et aliis Europae locis; quin etiam hodie frequens est in iis nationibus. In Damasco enim, ut a viatoribus accepi, duo sunt nosocomia leprosis sanandis destinata. Et Edessa fontem habet, in quo lavantur quotidie, ut antiquitus in more fuit, magno numero hac cutis foeditate affecti.

Quinimo praecipuas, quae in leprae Mosaicae descriptione occurrunt, notas, exceptis duntaxat ve-

<sup>1</sup> *Epist. Medicinal. Lib. vii. Epist. 2.*



stium et aedium inquinamentis (de quibus mox dicam) a medicis Graecis memoratas legimus. Ipse Hippocrates λεύκην appellat Φοινικίην νόσον, *morbum Phoenicium*<sup>1</sup>. Φοινικίην enim pro φθινικήν legendum esse ex Galeni *explicatione linguarum Hippocratis* manifesto apparet; apud quem Φοινικίην νόσος est morbus, qui *in Phoenicia et aliis orientalibus regionibus frequens est*<sup>2</sup>. Congeneres autem morbos esse *leucen et elephantiam* in capite praecedente dixi<sup>3</sup>; unde, ut idem observat, alter altero interdum mutatur<sup>4</sup>. Caeterum qualis sit uterque affectus, ex nullo auctore melius discemus, quam ex Celso. Is circa imperatoris Augusti tempora praecipua omnia, quae Graeci, tam medici quam chi-

<sup>1</sup> *Prorrhetic. Lib. ii.* | καὶ μέγη πλεονάζουσα.  
*sub finem.*

<sup>3</sup> *Pag. 10.*

<sup>2</sup> Ἡ καὶ Φοινικην, καὶ  
καὶ τὰ ἄλλα ἀνατολι-

<sup>4</sup> *De simpl. medicam.*  
*facult. Lib. xi.*

rurgi,



rurgi, ad artem medendi spectantia scripserant, collecta et in ordinem digesta, in suum, hoc est, in Latinum sermonem elegantissime et sapientissime convertit. De leuce autem verba ejus ita se habent. *Vitiliginis, inquit, tres species sunt.* Ἄλφος vocatur, ubi color albus est, fere subasper, et non continuus, ut quaedam quasi guttae dispersae videantur; interdum etiam latius, et cum quibusdam intermissionibus serpit. Μέλας colore ab hoc differt, quia niger est, et umbrae similis, caetera eadem sunt. Λεύκη habet quiddam simile ἄλφω, sed magis albida est, et altius descendit; in eaque albi pili sunt, et lanugini similes. Omnia haec serpunt, sed in aliis celerius, in aliis tardius. Alphos et melas in quibusdam variis temporibus oriuntur et desinunt. Leuce, quem occupavit, non facile dimittit<sup>1</sup>.

<sup>1</sup> De medicina, Lib. v. Cap. xxviii. § 19.



*In elephantia vero, ut scribit, totum corpus afficitur ita, ut ossa quoque vitiari dicantur. Summa pars corporis crebras maculas, crebrosque tumores habet; rubor earum paulatim in atrum colorem convertitur. Summa cutis inaequaliter crassa, tenuis, dura, mollisque, quasi squamis quibusdam exasperatur; corpus emacrescit; os, surae, pedes intumescunt. Ubi vetus morbus est, digiti in manibus pedibusque sub tumore conduntur<sup>1</sup>. Hisce congruentia sunt, quae apud Arabas medicos leguntur. Avicenna, horum princeps, lepram esse dicit, quasi cancrum communem toti corpori<sup>2</sup>. Ex his igitur omnibus manifestum fit, lepram in Syria non natura, sed gradu tantum, ab illa in Graecia, quae λεύκη ibi vocabatur, diversam fuisse; et ipsum hunc morbum interdum apud*

<sup>1</sup> *Lib. iii. Cap. xxv.* | *3. Traët. 3. Cap. 1.*

<sup>2</sup> *Canon. Lib. iv. Fen.*



Graecos, maxime vero inter Arabas, elephantiae affinem fuisse. Caelum enim, et victus ratio, morbos omnes in cute prorumpentes in pejus evahunt.

QVOD ad vestium autem contagia attinet, certissimis experimentis compertum est, non tantum in peste, et aliis nonnullis febribus; in quibus per cutem pustulae malignae protruduntur, ut in variolis et morbillis; sed et in ipsa vulgari scabie morbidam vim in rebus quibuscumque pelliceis, laneis, linteis, et sericis exceptam diu haerere, et hinc in sana corpora transire. Potuit igitur facile per talia leprosum virus in illos, qui haec gestabant, aut contrectabant, seminis ad instar spargi, et cutem labe sibi propria corrumpere. Summa enim corporis pars, quantumvis mollis et laevis videatur, foraminibus tamen pervia, et fulcis aspera,



nidum praebet particulis ex tabo spirantibus, minutissimis quidem illis, sed maxime actuosis. Sed haec in libro *De peste* fusius exposui<sup>1</sup>. Contagiosum autem istud seminium humore acri et falso, a sanguine derivato, commiscetur; qui, cum natura partim in nutrimentum cedere, partim per cutem exsudare debuisset, hujus squamulas corrumpit; quae aridae factae, et albae, interdum etiam niveae, a cute resolvuntur, ac furfuris ritu decidunt. Et licet morbus hic apud nos, quibus caelum est frigidius, rarus admodum et insolitus sit; vidi tamen ipse rusticum quendam ita miserabiliter toto corpore illo occupatum, ut cutis quasi nive cooperta splenderet; squamae vero furfuraceae assidue defricabantur, subtus apparente carne viva. Miser iste in loco uliginoso vitam omnem transegerat, pravo vi-

<sup>1</sup> *Cap. i.*



āu et aqua corrupta fordidum corpus sustentans.

AT difficilior multo est de domibus pollutis quaestio. Vix enim natura fieri posse videtur, ut in parietibus ficcis, et ex dura materia coagmentatis, nasci et se diffundere potuissent maculae leprosaе. Subiit tamen aliquando mentem meam evenire potuisse, ut in muris aedium, qui ex materie admodum varia, calce fortasse, lapidibus, terra bituminosa, pilis animalium, et similibus commistis, constructi erant, exaestuando *scrobes virides aut rufos intra superficiem* parerent<sup>1</sup>; qui, cum leprosam in corpore humano scabiem quodammodo referrent, *lepra in domo* vocabantur. Facillime enim effervescent corpora natura diversa, cum permiscentur et coeunt. Humor igitur istiusmodi prorumpens pau-

<sup>1</sup> *Levit. Cap. xiv. § 37.*



latim in pariete serpsisse, et licet non esset contagiosus, foetido tamen et insalubri halitu incolis noxam et perniciem adtulisse censeatur. Nec dissimile quiddam haud raro nostris in domiciliis observare licet, ubi in muris, gypso parum idoneo obductis, sales calcarii et nitrosi niveo fere colore propullulant. Sacerdotibus autem domus eorum data fuit invisendi potestas; qui, ubi hanc foeditatem animadverterent, muros primum circumradere; deinde, si perstitisset adhuc vitium, etiam domum diruere, et totam extra oppidum in locum immundum exportare jubebantur.

Scio hoc ita enunciari, quasi Deus ipse domum hac peste affecisset. At notum est in Judaica historia istum loquendi morem haud inusitatum esse; ut in calamitatibus et rebus malis, quae nec opinato eveniunt,



unt, et terrorem incutiunt, illa interdum a Deo fieri dicantur, quae a causis naturalibus proveniant. Nec id facile credam, quod tamen nonnullis videtur, Deum ipsum, qui populum suum omnibus immunditiis immunem semper esse iussit, foedissima hac poena, edito miraculo, quenquam multare voluisse. Illud extra dubium est, ita constituta fuisse legis Mosaicae praecepta, ut populum ab idololatria et vanis religionibus averterent, simulque ab omnibus immunditiis purum praestarent<sup>1</sup>. Huc spectabant sanguinis in cibo, morticinorum, carnis suum, et aliorum quorundam animalium interdictio<sup>2</sup>. Haec enim omnia nutrimentum crassum, quod in morbis, qui cutem occupant, incommodum est et noxium, corpori suppeditant.

<sup>1</sup> *Mos. Majemonid. More Nevachim, Part. iii.* | *Cap. xxxiii et xliix.*  
<sup>2</sup> *Lev. Cap. xi et xvii.*



VT theologicis autem hisce medicum aliquid adjiciam, experientia compertum habeo, non aliud dari adversus foedum hunc morbum praestantius remedium *tinctura cantaridum*, qualis in *Pharmacopoeia Londinensi* proponitur. Haec ejus vis insigni illi virtuti urinam movendi, qua pollent ista infecta, debetur. Magnus enim est renes inter et cutis glandulas consensus, ita ut humores in has delati per illos facile viam inveniant, et urinae profluvio expurgentur; contra vero, ubi renes diutius officio suo quacunque de causa defuerint, urinosus liquor per cutis meatus interdum transfudat. Interponenda tamen per vices erunt medicamenta ejus generis cathartica, quae crassis et acribus humoribus foras ejiciendis sunt maxime accommodata.





## CAPUT III.

*Regis Sauli morbus.*

CUM “Saulus rex Jovae spiritu  
“destitutus a malo spiritu,  
“auctore Jova, vexabatur; suase-  
“runt ei ejus affectatores, ut suis  
“famulis negotium daret, ut ali-  
“quem tangendae citharae peritum  
“conquirerent, qui eum malo Dei  
“spiritu correptum pulsandis fidi-  
“bus mitigaret. Quod cum, accer-  
sito Davide, factum esset, “quan-  
“docunque accidebat Saulum di-  
“vino illo spiritu corripere, David  
“correptam citharam manu pulsa-  
“bat; atque ita respirabat Saulus,  
“et, faceffente ab eo malo illo spi-  
“ritu, mitigabatur<sup>1</sup>.”

<sup>1</sup> Vid. *Regum Lib. i. Cap. xvi.*



MANIFESTVM mihi videtur regis hujus morbum veram insaniam fuisse, ex eo scilicet genere, quae in tristitia consistit, et quam atram bilem contrahere dixerunt medici veteres. Haec autem incertis vicibus illum occupabat, ut saepe fit in istiusmodi generis malis. Neque latere poterat aegrimoniae illius causa, utpote qui Jovae mandato regno suo nuper erat exutus. Aptissimum autem erat, quod adhibebatur remedium, citharae nimirum pulsatio. Jam olim enim medici ad discutendas tristes cogitationes symphonias, cymbala, strepitusque proficere docuerunt<sup>1</sup>; quorum virtutem juxta leges geometricas nos alibi exposuimus<sup>2</sup>. Hinc etiam clarius patet causas naturales habuisse istum affectum, qui enim alias posset citharae cantus illum depellere? Con-

<sup>1</sup> Vid. *Celsum*, *Lib.* |  
iii. *Cap.* xviii.

<sup>2</sup> *Mechan. Acc. of Poisons*, *Essay* ii. 4 ed.



filium autem in homine et prudentia Dei spiritus, eis vero destitutus a malo spiritu vexari, hoc est, mente capi, ex Hebraicae linguae usu dicebatur.

Non sum nescius Judaeos loquendi modo sibi familiari ad angelorum malorum, Jovae ministrorum, potentiam hujusmodi morbos referre solitos esse; quin et nunc dierum viros quosdam doctissimos eandem sententiam tueri. Mihi vero, si libere id, quod censeo, profari liceat, non recte videntur ad iram divinam referri morbi, quos causas naturales habere ostendi potest; nisi diserte denunciatur illos divinitus immitti. Cum enim in delictorum poenam proveniant, frustra esset Summi Legislatoris propositum, nullo dato documento, quo vindicta ejus ab eventibus vulgaribus distingueretur; quoniam infantes etiam funesti ejus-



modi casus incescere possunt. Porro rationi consentaneum videtur, ut inflicta ab Omnipotenti Judice damna aut immedicabilia sint, aut ab ipso solo tollantur; quo clarius elucescat ejus cum aequitate juncta potentia. Tali discrimine ea, quae miraculo fiunt, ab iis, quae contingunt natura, dignoscuntur. Neque enim credere par est, id velle rerum Opificem ter Optimum Maximum, ut irrita sint opera sua. Idcirco notatu dignum est, caveri semper in sacris historiis, ut in istiusmodi casibus divina vis manifestissima sit, et omnibus compareat. Ita cum Jova ob peccatum commissum Mariam lepra contaminavit, et illam, Mose veniam deprecante, sanam reddere voluit, post septem demum dies id factum est<sup>1</sup>. Gihezis lepra in ipso suaque progenie perpetuo haesit<sup>2</sup>.

<sup>1</sup> *Numer. Cap. xii.* | <sup>2</sup> *Regum Lib. iv. Cap.*  
<sup>1</sup> 14. | v. 27.



Azarias rex, quod facella non demolitus esset, lepra ad mortem usque affectus est<sup>1</sup>. Ananias et conjux ejus, Petro miraculum id edente, exanimati subito corruerunt<sup>2</sup>. Elymas magus, in poenam fraudis suae et sceleris, a Paulo caecitate ad tempus percussus est<sup>3</sup>. Cum ergo comminationes et indicia morborum, insolito modo inferendorum, nunquam non proferantur; quidni, ubi illa defunt, nihil supra naturam evenisse dicamus? Et hoc quidem de aliis etiam calamitatibus semel in universum dictum velim.

<sup>1</sup> *Regum Lib. iv. Cap. xv. § 5.*

<sup>2</sup> *Act. Apost. Cap. v.*

<sup>3</sup> *Ib. Cap. xiii. § 11.*







## CAPVT IV.

*Jorami regis morbus.*

**D**E Joramo Judaeae rege narratur, quod, cum is Jovam offendisset, “ Jova eum tam infanabili intestinorum morbo affectus, ut continuatis diebus, peracto biennii spatio, ejectis cum morbo intestinis, mortuus sit morbo gravissimo<sup>1</sup>.” Hunc eundem interitum habuisse perhibentur impii reges duo, Antiochus Illustris et Agrippa, de quibus id dictum fuit: Εἰς τί τὰ σπλάγχνα τοῖς ἑσπλαγχνιζομένοις<sup>2</sup>.

<sup>1</sup> Paralipomen. Lib. ii. Cap. xxi. § 18.

<sup>2</sup> Vid. Grotii notas ad hunc locum.

NON



Non alius autem, ut mihi videtur, fuit hic morbus, quam gravis dysenteria. In hac enim intestina exulcerantur, ex quibus cruor manat, cum stercore aliquo semper liquido, et quibusdam quasi mucosis; nonnunquam etiam carnosae quaedam ramenta simul descendunt, ita ut ipsa intestina ejici videantur.







## CAPVT V.

*Ezechiae regis morbus.*

“ CVM Jovae mandato Ezechiae  
 “ lethaliter aegrotanti nun-  
 “ ciaffet Esaias vates, illum moritu-  
 “ rum esse, neque revaliturum; Jo-  
 “ va, precibus ipsius exauditis, E-  
 “ saiam reverti jussit, et dicere, se il-  
 “ lum sanaturum post triduum. Jus-  
 “ sit autem Esaias *massam ficuum*  
 “ fumi, eamque ulceri imponi; quo  
 “ facto, ille convaluit <sup>1</sup>.”

Id mihi verisimillimum videtur,  
 febre laborasse regem, quae in ab-  
 scessum definebat. In hujusmodi  
 autem casibus ea semper conveni-  
 unt, quae suppurationem promo-  
 vent, cataplasmata in primis, quae

<sup>1</sup> *Regum Lib. iv. Cap. xx.*



digerunt et resolvunt; neque aliud fere praestantius est illo, quod ex *ficubus aridis* conficitur. Ita, cum verbo solo poterat, maluit Omnipotens remediorum naturalium efficientia morbum hunc depellere. Quo certe docemur in rebus adversis, adjunctis ad Deum precibus ut incepta secundet, usum illorum, quae beneficus nobis indulget, non negligere.







## CAPVT VI.

*Senectus morbus.*

**S**ENECTVS *ipsa est morbus*, ficut recte dixit poëta<sup>†</sup>. Cum itaque elegantissimam ejus descriptionem, a regum sapientissimo Solomone factam, cum voluptate saepe perlegerim; non alienum esse puto a proposito meo, si dilucidius illam, prout potero, exponam atque illustrem. Sunt enim quaedam intellectu non adeo facilia, quod ἀλληγορικῶς omnia exprimere voluit facundus concionator. Primum autem ipsam orationem lectoris oculis subjiciam, quae ita se habet.

“ MEMENTO Creatoris tui, dum  
 “ juvenis es, antequam veniant ma-  
 “ la tempora, accedantque anni,  
 “ quibus te delectari neges: ante-  
 “ quam tenebrescat sol atque lux et

<sup>†</sup> Terent. Phorm. Act. iv. Sc. i. v. 9.

“ luna



“ luna et fidera, redeantque post  
“ pluviam nubes; tum quum do-  
“ mus custodes tremant, et nuta-  
“ bunt milites, et cessabunt immi-  
“ nutae molae; et caligabunt spe-  
“ ctantes per meatus; et claudentur  
“ fores extrinsecus, cum exili fo-  
“ nitu molae, et surgetur ad avis  
“ vocem; et cassae erunt omnes  
“ musicae puellae: quum etiam alta  
“ et illifus in via timebuntur; et  
“ florebit amygdalus; et convenient  
“ cicadae; et peribit appetitus, dis-  
“ cedente homine in aeternam do-  
“ mum suam, et circumeuntibus in  
“ vico lugentibus: antequam ab-  
“ rumpatur argentea catena; et  
“ quassetur guttus aureus; et urna  
“ frangatur ad scatebram; et con-  
“ quassetur ad foveam currus; re-  
“ deatque pulvis in terram, qualis  
“ fuerat; et spiritus ad Deum re-  
“ deat, qui eum dedit<sup>1</sup>. ”

<sup>1</sup> *Eccles.* xii. 1—7.



A MENTIS erroribus incipit enumeratio malorum. *Tenebrescit*, inquit, *sol atque lux et luna et sidera*. Perceptiones animi in senibus sunt minus vividae, rerumque ideae et imagines confunduntur, ac memoria deperditur; unde intellectum vim suam paulatim amittere necesse est. Sapientia et intelligentia *lumen* saepe in sacris literis vocantur<sup>1</sup>; contra vero *tenebris obduci*, et caecutire dicuntur, quibus rerum notitia eripitur<sup>2</sup>. Recte enim Cicero, *Ratio* inquit, *est quasi quaedam lux lumenque vitae*<sup>3</sup>. Hinc Deus Optimus Maximus *Pater luminum* appellatur<sup>4</sup>. Deficientes igitur animi virtutes sunt quasi obumbrata mundi lumina. Scio haec cum complurium doctissimorum interpretum sententiis

<sup>1</sup> *Job. xviii. v. 5, 6, 7.*

<sup>2</sup> *Matth. Cap. vi. v. 23.*

<sup>3</sup> *Job. Cap. ii. v. 11.*

<sup>3</sup> *Academ. iv. 8.*

<sup>4</sup> *Jacob. Epist. i. 17.*

pugnare,



pugnare, qui *luminum obscuritatem* ad nativum et proprium verborum sensum explicant, et *visus defectum* intelligi putant. Miror autem illos non advertisse, omnia in hoc capite, etiam minima quaeque, verbis translatis efferri. Etenim ut in depingendis senum calamitatibus actionum mentis laesiones, quae sunt omnium gravissimae, non erant praetermittendae; ita non poterant haec clarius exprimi, quam per lucidorum caeli corporum obscuracionem, quae orbem regunt, et temporum vicissitudines faciunt. Quod praecipue autem hic observandum venit, *visus vitia* in numerum malorum mox refert, neque eandem rem certe iterare voluit.

AT pergit interim, proximeque adjungit, quae cum jam dictis bene convenire videntur. *Redeunt post pluviam nubes.* Curae nimirum et molestiae



molestiae aliae alias insequuntur, et assidue senio confectos premunt. Sicut in humidis regionibus et tempestatibus obnoxiiis, etiamsi exhaustae videantur nubes, succedunt mox aliae, et pluviae recentes perpetuo fere ingruunt. Haec autem incommoda eo fiunt graviora, quo vires animi ad ea sustentanda aut depellenda minus nunc, quam olim, idoneae reddantur.

SED a mente ad corpus jam rex transit. *Domus*, inquit, *custodes tremant, et nutabunt milites, et cessabunt imminutae molae*. Membris etiam, ac firmissimis corporis partibus, sua dies adfert damna. Nervorum scilicet resolutio manus ac genua infestat. Hinc illae injuriis propulsandis, et innumeris vitae usibus, ad quos natura sunt instructae, inhabiles evadunt; haec vero oneri suo sustinendo imparia agilitatem suam



suam amittunt, flexuque vacillant. Dentes item molares aut excidunt, aut corrupti pereunt; ita ut pauci ad cibos duriores conficiendos amplius restent. In vocis Hebraicae interpretatione, quam hic *dentes molares* reddidi, Ariam Montanum secutus sum, qui recte, ut opinor, ita transtulit. Numero enim plurali hic ab auctore usurpatur, qui postea in singulari, sed diverso plane sensu, adhibet, ubi de gustandi sensu agit; ut mox ostendam, cum ad locum istum deveniam. Singulorum enim sensuum defectus, qui senectuti fere obrepunt, quin Solomon hic describere voluisset, nequaquam mihi dubium esse videtur.

AD hos itaque jam progrediens a visu initium capit. *Caligabunt*, inquit, *spectantes per meatus*. His autem verbis deficientem oculorum aciem designari manifestum est, quam plerique



plerique omnes affecta aetate experientia sua percipiunt.

SEQUITUR *gustatus*, quem ita describit: *Claudentur fores extrinsecus, cum exili sonitu molae.* Sicut fenestrae propter appetitus imminutionem labra sua rarius, quam olim, aperiunt; ita ob dentium ad cibos comminuos defectum sonitu etiam minori id faciunt. Horum autem posterius incommodum eleganter admodum verbis *exili sonitu molae* designari videtur. Etenim voce *mola*, quae Hebraice hic numero singulari adhibetur, ciborum confectio denotari potest; quae cum a senibus non dentium, qui jam perierunt, sed gingivarum fiat opera, sonitu leniori peragitur.

DVLCE laborum lenimen, viri-  
umque fractarum reparatio, somnus  
est. Appetitus autem imminutio,  
cibique fastidium, plerumque hunc  
aufert.



aufert. Hinc damnum illud senilis aetatis priori subjungens ait: *Surget ad avis vocem*, hoc est, ad primum galli cantum senex expergiscitur. Quare cum imbecillum corpus longiorem desideret quietem, brevior et interrupta ei contingit.

SED redit ad sensus, inter quos tertio loco *auditum* memorat; ad cuius beneficia percipienda aurium usum nobis praebuit Creator. Hunc autem aufert interdum, raro non minuit, aetas ingravescens, quod verbis sequentibus rex indicare voluit: *Cassae erunt omnes musicae puellae*. Sic enim auriculas appellare placuit, quibus tunc temporis non tantum sonorum oblectamentum frustra quaeritur; sed, quod multo est molestius, voces etiam alloquentium haud facile percipiuntur: quo cum jucunditas, tum maxima simul vitae commoditas, sensim perit. Hinc



in *Historia Judaica* Berzellaeus, octoginta annos natus, conqueritur se *fidicinum fidicinarumque cantus audire* amplius non potuisse<sup>1</sup>.

HAEC aurium damna, quae *tangendi* sensus patitur, proxime excipiunt. *Tactus* autem, ut ait Cicero, *in toto corpore aequabiliter fusus est, ut omnes ictus rerumque appulsus sentire possimus*<sup>2</sup>. Ad corporis igitur tutamen, et complurium malorum, quibus perpetuo fere obiectatur, depulsionem, hic sensus inter alios ejus usus plurimum confert. Id quod auctor sagacissimus hoc loco potissimum respicere censeatur, cum dicit: *Alta et illis in via timebuntur*. Etenim ut fenes, in via plana et aequali ambulantes, membrorum imbecillitate instabiles agunt gressus; ita in asperam et fra-

<sup>1</sup> *Reg. Lib. ii. Cap. |* <sup>2</sup> *Nat. Deor. ii. 56.*  
xix. § 35.



gofam incidentes, sensus hujus torpore haud tempestive fatis praesentiunt, quin si depressior sit titubandi, sin altior cespitandi ac pedem offendendi, periculum adeant. Non immerito igitur, ut timore isto perculsi, hic repraesentari videntur.

E SENSUVM numero restat *olfactus*, ad quem postremo deveniens, imminutionem ejus in senibus non minus eleganter, quam breviter, hoc pacto describit: *Florebit amygdalus*. Quibus verbis indicare videtur, senes tanquam in perpetua hieme constitutos, verni et aestivi temporis gratissimos odores, ex plantis ac floribus emissos, haud amplius percipere. Hieme autem florere hanc arborem ex Plinio discimus, qui de illa tractans, *Floret*, inquit, *prima omnium amygdala, mense Januario*<sup>1</sup>. De cænitie hæc a plerisque interpretibus

<sup>1</sup> *Lib. xvi. § 42.*



explicari haud ignoro, quam, ut certissimum fere senectutis signum, per albos amygdali flores denotari volunt. At enim, cum quatuor sensuum defectus per indicia tam clara et perspicua scriptor prudentissimus depinxerit, quantum silentio penitus praeterire voluisse quis credat? Quid, quod crines albi pro certo et indubitato senectae indicio minime censeferi debent; cum non paucos, qui vel in media aetate, viribus corporis nondum affectis, canescunt, reperire liceat? Praeterea, quod de amygdali floribus aiunt, huic rei minime convenire videtur, qui non album sed purpureum colorem exhibent. Sed haecenus de sensibus, ad reliqua pergamus.

LONGA aetate proVectis commune malum est *hernia*, tam illa, quae devoluto in scrotum intestino, aut omento fit; quam quae, distrahen-

te



te eam partem humore, nascitur. In utraque autem tumor exoritur. Infestum hunc morbum cum locusta comparare voluit concionator. *Oneri*, inquit, *erit locusta*. Sic enim melius, quam *convenient cicadae* (ut vertit eruditissimus Castalio) verbum verbo redditur phrasis Hebraea. Et versio quidem vulgata habet *impinguabitur locusta*. Septuaginta interpretes Παχυνθή η ἀρχή. Versio etiam Arabica, Latine reddita, *pinguescet locusta*. Nostra vero Anglicana, *The grasshopper shall be a burden*. Scimus linguam Hebraicam semper esse verecundam, et scriptores sacros in iis exprimendis, quae ad partes naturales pertinent, inhonestis et obscœnis vocibus abstinentes alias mutuari, atque a rebus quibuscumque, ne castas aures offendant, similitudines ducere. Quod in regis hujusce *Cantico Canticorum* quam maxime observare licet. Deforme autem animalculum



malculum est locusta, ex solo fere abdomine constans; quam, in primis cum ovulis suis gravescit, scrotum, hernia tumefactum, cum parte virili referre quodammodo dici potest.

PARTIBVS hisce tali modo affectis, *appetitum perire* addit vir scientissimus; non tam ad cibos hic respiciens, quam ad illa, quae vigenti congruunt aetati. Nam, ut dixit *artis amandi* magister: *Turpe senilis amor*<sup>1</sup>.

TANTO igitur malorum cumulo senes oneratos ad mortem deprimi, et suorum luctu *in aeternam domum suam*, qua corpora conduntur, *discedere*, nemini mirum esse potest. Caeterum intra hos fines aerumnas eorum, dum vivunt, haud semper consistere, sed alias quoque nonnunquam accedere, in reliqua orationis parte monemur.

<sup>1</sup> Ovid. *Amorum* L. i. *Eleg.* ix. v. 4.



NON enim membris tantum atque artubus decrefcit per aetatem fuum robur; fed et fpina dorfi, imminuta indies mufculorum et ligamentorum vi, aliquid de fua ftabilitate deperdit: hinc fenex erectus ftare nequit, et pronum in terram, qua brevi tegendum erit, corpus inclinat. Haec *catenae argenteae* affimilatur, quae *abrumpi* dicitur. Vertebrae enim, ex quibus conftat, quafi annuli funt, et in pofteriorem partem, incurvato corpore, prominent. Quinetiam medulla, quae per has fertur, *argentei* five albidi coloris reperitur.

QVAE haftenus dicta funt, difficillimos explicatus non habent. Tria autem, quae concionem concludunt, incommoda revera funt aenigmata, et Oedipi conjectoris indigent; qui tamen cum, faltem me iudice, nondum repertus fit, ipfe pro viribus ea  
x
solvere



solvere conabor. *Quassatur*, inquit, *guttus aureus: urna frangitur ad sca-*  
*tebram: et conquassatur ad foveam*  
*currus.*

DESTILLATIONES humoris ex ca-  
pite in nares, fauces, et pulmonem  
fenes vexant; quae profluenti ex  
quassata ampulla, vel *gutto*, aquae  
assimilantur. Propter dignitatem ve-  
ro capitis *aureus* dicitur *guttus*.

NEQVE a capite tantum defluit  
pituita, sed et aliae partes liquorem  
suum inordinate effundunt. A re-  
nibus enim (quorum cavitas etiam  
nunc ab anatomicis *pelvis* dicitur)  
quod in iis secernitur ex sanguine,  
in vesicam profluit; quae ad debi-  
tum tempus propter resolutum suum  
sphincterem, quasi *fracta ad fontem*  
*urna*, id retinere nequit. Hinc foe-  
dum urinae stillicidium assidue mo-  
lestiam creat.

ET



ET hae quidem noxae singulas partes premunt; postrema vero, cum in hac oratione, tum in senibus calamitas, est universi corporis afflictio. Sanguinis ipsius cursus interrumpitur; hinc spiritus difficultas, apoplexia, aut lethargus misellos occupat. Cor etiam, vitae principium et fons, vi sua defectum jam concidit, *et in foveam labitur quasi satus currus.* Ignorabant quidem veteres sanguinis circuitum; at vitalem hunc humorem huc illuc per corpus aliquo modo moveri, viscera et membra calore suo fovere, frigidum denique circum praecordia in morte concrefcere, nescire non poterant.

NOTATV autem maxime dignum est effatum illud, quo rex sapientissimus concionem suam concludit. *Redit, inquit, pulvis in terram, qualis fuerat; et spiritus ad Deum redit,*

H

dit,



*dit, qui illum dedit.* Quibus verbis, ut videtur, ignorantiae illorum, qui animum simul cum corpore interire putarunt, occurrere, et immortalitatem ejus asserere voluit.







CAPVT VII.

*Nabuchodonosoris regis morbus.*

A DEO mirabilia et praeter naturam videntur ea, quae de Nabuchodonosore Babyloniae rege narrantur, ut illum in bestiam vera transformatum fuisse somniarint nonnulli interpretes. Haec autem illi contigerunt: “ Ab hominibus  
“ per annos septem depulsus inter  
“ bestias versabatur, herbis more  
“ boum pastus; corpus rore caelesti  
“ tingebatur; pili, et ungues ut alitibus, increverunt. Exacto tandem  
“ illo temporis spatio, ad se rediit,  
“ regnique sui majestas, aucta etiam  
“ dignitate, ipsi restituta est. Crimen autem ejus fuerat superbia, et  
“ Dei contemptus’.”

¶ Vid. *Dan. Prophet. Cap. iv et v.*

H 2

HAEC



HAEC omnia ita homini infano et melancholico conveniunt, ut certum mihi videatur regem hunc mente captum in agros migrasse; cumque se in bovem mutatum esse imaginaretur, pecudum ritu herbas comedisse. Est enim, ut infra expositurus sum<sup>1</sup>, laesae imaginationis morbus omnis insania, qua ille laborans septem annos vitam infelix transegit. Cultus autem corporis negligentia pili et ungues in longitudinem ultra modum creverunt, unde hi crassiores facti et incurvati avium ungues referebant. Hanc autem insaniam *lupinam*, aut *caninam*, appellarunt medici veteres; eaque affectos *λυκανθρώπους*, aut *κυνανθρώπους*. Quos noctu exire dicebant, imitantes in omnibus lupos, aut canes; monumenta etiam mortuorum praecipue aperire; tibiaeque habere penitus exulceratas propter casus assiduos,

<sup>1</sup> Vid. infra, *Cap. ix. De Daemoniacis.*



*Nabuchodonosoris morbus.* 53

et caninos morsus<sup>1</sup>. Simili modo infanivisse Proeti filiae narrantur; quae, ut ait Virgilius,

*Implerunt falsis mugitibus agros*<sup>2</sup>.

Nam, ut Servius notat, *Juno hunc furorem earum immisit mentibus, ut putantes se vaccas in saltus abirent, et plerumque mugirent, et timerent aratra.* Has autem, teste Ovidio, Melampus medicus

*Per carmen et herbas*

*Eripuit furiis*<sup>3</sup>.

Neque nostris temporibus ignotus fuit hujusmodi affectus. Cujus insigne exemplum in agricola Patavino memorat Schenckius; *qui sibi lupo videbatur, multosque in agris insiluit trucidavitque, tandemque captus constanter asseveravit se verum esse lu-*

<sup>1</sup> Vid. *Aetium, Lib.* | *iii. Cap. xvi.*

*medicin. Lib. vi. Cap. ii.* | <sup>2</sup> *Eclog. vi. 48.*

*et Paul. Aeginet. Lib.* | <sup>3</sup> *Metam. xv. 325.*



54 *Nabuchodonosoris morbus.*

*pum, discrimen solum existere in pelle cum pilis inversa<sup>1</sup>.*

NOSTRAE autem sententiae illud forsan obstare videbitur, quod regi praedictum fuerat hoc infortunium, ita ut mores suos corrigendo id praecavere potuisset; ideoque secundum naturam contigisse non sit verisimile. Scimus autem tum ea, quae clementer, tum quae per vindictam exequitur Deus, saepe causarum naturalium adjumentis peragi. Sic Ezechiae mortem comminatus, precibus ejus victus, vitam illi reddidit, et, ficubus tumori superimpositis, fecit morbo medicinam<sup>2</sup>. Herodem regem propter superbiam vermium erosionibus consumi jussit<sup>3</sup>. Pestes denique, quae ad iram divinam ab omnibus fere referuntur, corrupti aëris vitio plerumque originem debere nemo dubitat.

<sup>1</sup> *Observat. med. rar. de Lycanthrop. Obs. i.*

<sup>2</sup> *Vid. sup. Cap. v. p. 32.*

<sup>3</sup> *Vid. infra Cap. xv.*





## CAPVT VIII.

*Paralyfis.*

**T**RES in facris Evangeliiis memorantur paralytici a Christo fanati<sup>†</sup>. Ex his unius, qui tertio loco recensetur, morbum, quoniam in eo singularia quaedam occurrunt, speciatim referam. Narrat itaque Divus Johannes, “ Hierosolymis a-  
“ pud oviaricam piscinam jacuisse  
“ ingentem aegrotantium multitu-  
“ dinem, caecorum, claudorum, ta-  
“ bidorum, aquae motionem expe-  
“ ctantium. Angelus enim certo  
“ tempore descendebat in piscinam,  
“ aquamque turbabat; post quam  
“ turbationem qui primus descen-  
“ debat, sanus evadebat, quocunque  
“ tandem morbo teneretur. Erat

† Vid. *Matth. Cap. viii et ix.* et *Johan. Cap. v.*

“ autem



“ autem illic homo quidam annum  
 “ agens in morbo duodequadrage-  
 “ simum. Hunc ut vidit Jesus de-  
 “ cumbentem, et jam diu decubu-  
 “ isse cognovit, dicit ei, *Vis sanus*  
 “ *fieri?* Cui aegrotus, *Domine, in-*  
 “ *quit respondens, hominem non ha-*  
 “ *beo, qui me, dum turbata est aqua,*  
 “ *conjiciat in piscinam; interim ve-*  
 “ *ro dum eo ego, alius ante me de-*  
 “ *scendit.* Tum Jesus, *Surge, in-*  
 “ *quit ei, et ambula.* Atque homo  
 “ confestim sanus evasit, et sublato  
 “ suo grabato ambulabat.

STAGNUM hoc, vel quoddam cer-  
 te ejus loco, religiosi incolae etiam  
 hodie viatoribus ostendunt<sup>1</sup>. Sed et,  
 quod magis ad rem facit, Eusebius  
 suo adhuc tempore extitisse eam pi-  
 scinam, et geminas paludes habuisse  
 testatur; quarum utraque, ut ait,

<sup>1</sup> Vid. Cotovici Itine- | et Maundrell's Journey  
 rarium Hierosolymita- | from Aleppo to Jerusa-  
 num, Lib. ii. Cap. 11. | lem, pag. m. 107.



anniverfariis imbribus replebatur, altera vero mire rubentem praebebat aquam<sup>1</sup>. Causam hujus coloris refert juxta vulgarem opinionem ad facrificia, quae olim in ea munda- bantur. At minime dubito, quin a terra miniata, five ochra, quae in balneis frequens est, a pluviis certis temporibus decidentibus e fundo sursum lata, et cum aqua commista, ortum habuerit.

Non una res hic torquet inter- pretes. Disquirunt enim primo, qua- lis esset ista aqua; deinde cur non sine turbatione vim suam exerere poterat; tum quaenam esset ista turbatio; denique de angelo, quis- nam ille foret, inter se dissident. Ego, quae de hisce singulis dicenda habeo, breviter exponam.

<sup>1</sup> *Onomasticon urbium* | *pturae, in voce Βηζα-*  
*et locorum Sacrae Scri-* | *94.*



PRIMUM igitur utilissimae habebantur ad multos morbos usu tam externo, quam interno, apud veteres aquae naturam metallicam secum ferentes; quae pro varia indole venarum metalli, per quas fluebant, aliis atque aliis morbis accommodabantur. Hinc in resolutione nervorum *natationes in aqua marina, vel salsa, potissimum si quo loco eae naturales, vel etiam manufactae sint*, commendat Celsus<sup>1</sup>. Et Plinius, *Est autem, inquit, utilis aqua sulphurata nervis, aluminata paralyticis, vel simili modo solutis*. Quin et subjungit, *Utuntur coeno fontium illorum utiliter; sed ita, si illitum sole inarescat*<sup>2</sup>. Idem auctor de fontium quorundam scaturigine mira tradit. *In Boeotia, ut ait, duo sunt fontes, quorum alter memoriam, alter oblivionem affert*<sup>3</sup>. *In Macedonia duo rivi confluunt, alter saluberrimi po-*

<sup>1</sup> Lib. iii. Cap. xxvii.

<sup>2</sup> Lib. xxxi. § 32.

<sup>3</sup> Ibid. § 11.



*ius, alter mortiferi*<sup>1</sup>. Et alia confimilia. His addi potest, quod de fluvio Adonide in terra Bybriorum refert testis oculatus Lucianus. *Ille quotannis colorem amittit, et quasi cruore infectus ipsum pelagus, in quod influit, purpureum efficit*; cujus rei hanc causam addit, quod *per montem Libanum, cujus terra miniata est, deferatur*<sup>2</sup>. Neque alienum est observare, in regionibus quibusdam reperiri miras aquarum eruptiones. Connachiae in Hibernia fons est dulcis aquae, in vertice montis excelsi, qui marinos aestus imitatur, bis die deficiens, bisque exundans<sup>3</sup>. Lunarem virtutem sentit fons quidam Hungariae, in comitatu Saros; quem crescente luna augeri, deficiente minui, et in interlunio prorsus deficere compertum est<sup>4</sup>. Denique

<sup>1</sup> Lib. xxxi. § 19.

<sup>2</sup> De dea Syria.

<sup>3</sup> Vid. Ortelii Theatr. orbis terrarum.

<sup>4</sup> Vid. Geo. Vuernberum De admirandis Hungariae aquis.



haud rari erant in Palaestina fontes medicamentosi, quorum historias collegit vir literis orientalibus doctissimus, Hadrianus Relandus<sup>1</sup>.

ATTAMEN qui pro miraculo hic contendunt, nulla balnea reperiri aiunt, qui omnibus quibuscunque morbis medeantur; nec quae unico tantum singulis annis mense virtutem suam exerant; addunt etiam hanc aquam, ab angelo demum turbatam, salutarem fuisse. Qui aliter autem sentiunt, plurimas aquas, quae salibus metallicis gravidae certis anni temporibus salutares sunt, memorant, quarum limus a fundo sursum evectus multis morbis fuit auxilio. Quae natura igitur per se efficere potest, ad vires supra eam positas haud recte referri dicunt. Quantum autem de contrariis his sententiis judicare valeam, media quaedam in-

<sup>1</sup> *Palaestina ex monument. vet. illustrata,* | *pag. 300, etc.*



ter utramque mihi vero proxima esse videtur.

CENSEO enim piscinae hujus aquam vim medicatam a coeno, in fundo suo haerente, acquisivisse; quod salibus metallicis ex sulphure forsan, alumine, aut nitro, gravidum erat. Haec autem, quum aqua causa aliqua naturali, calore forsan subterraneo, aut imbribus, turbaretur, sursum elevata ei miscbantur, illis profutura, qui, antequam subsedissent particulae metallica, in piscinam descenderent. Minime ergo mirum est in porticibus, quas quinque habuisse dicitur hoc lavacrum, convenisse semper *ingentem aegrotantium multitudinem, aquae motionem expectantium*; iisque praecipue morbis laborantium, ad quos illa utilis erat, caecitate nimirum, nervorum resolutione, et tabe. Neque aliter fieri potuit, quin omni  
ope



ope contenderent quamprimum im-  
mitti; ne forte, limo deorsum lato,  
de spe sua deciderent. Qui *primus*  
itaque *descendit*, aquae virtutem ex-  
periebatur.

ILLUD autem proxime notandum  
venit, *Cum esset festum Judaeorum*,  
Pentecoste nimirum, contigisse id,  
quod dicitur. Et anniversariam tan-  
tum fuisse hanc sanationem ex Eu-  
sebio discimus<sup>1</sup>. Notum vero est  
festum illud mense Maio, vel circa  
initium mensis Junii, celebratum  
fuisse; quod tempus aquarum salu-  
brium virtutibus opportunum est.  
Idcirco eo majori studio confluebant  
huc aegrotantes, ut medicamen ar-  
riperent, quo semel omnino quot-  
annis uti licebat.

DENIQUE quod ad angelum spe-  
ctat, qui *certis temporibus aquam*  
*turbasse* dicitur; salutarem hanc

<sup>1</sup> *Loco citato.*



stagni virtutem ei tribuunt, qui pro miraculo contendunt. Judaeos autem, si quid rarum et stupendum accideret, cujus causam investigare nequibant, id ab *angelo Dei* factum esse dicere solitos, antea observavimus. Veruntamen iis, quae a natura provenerunt, miraculum istud addere potuit Deus; ut certo solummodo anni tempore, eoque praefertim, quo ad festum solenne celebrandum gens universa conveniebat, salutare esset hoc stagnum; eique tantum, qui primus ingrederetur. Cujus rei (si de consiliis divinis conjectari liceat) ea forsan causa fuisset; quod signo adeo manifesto delectum sibi populum Deus, ut promiserat, antequam Messias advenisset, se non prorsus deserturum, testari dignaretur.

Ad summam igitur, salutaris haec aquae vis, quae natura sua esset medicinalis,



dicinalis, a Deo ita disposita fuisse videtur, ut simul praesentiae suae populo Judaico tesseram praeberet. Sed clarius illa remedium, verbum suum ἀλεξίκακον, huic infirmo subministravit Christi potentia. Quae eo tunc erat opportunior, quoniam malum id, quod tot annis inveteraverat, naturali remedio vinci non poterat; unde clarius effulsit divina ipsius virtus.







## CAPVT IX.

*De daemoniacis.*

**D**ÆMONIACOS, δαιμονιζόμενες, in  
 Evangeliiis memoratos morbo  
 revera naturali, et illo quidem dif-  
 ficili laborasse, ex descriptis eorum  
 historiis mihi verisimillimum esse  
 videtur. Varie quidem afficieban-  
 tur. Nunc enim “ laceratis vestibus  
 “ nudi incedebant, obviis quibusque  
 “ terrorem incutientes, sua etiam  
 “ corpora fauciantes; ita furiosi, ut  
 “ catenis licet compedibusque vin-  
 “ cti, ruptis vinculis, in locis ma-  
 “ xime desertis, et inter sepulchra  
 “ mortuorum vagabundi errarent.  
 “ Quinetiam a multis daemonibus  
 “ obsessos se esse interdum clama-  
 “ bant, quos etiam ex se in alia  
 “ corpora posse migrare crede-  
 K                      “ bant.



“bant<sup>1</sup>. Alias ingenti cum clamore  
 “aut lacerabantur<sup>2</sup>; aut ex prostratis,  
 “at illaesis, daemonium exivit<sup>3</sup>.”

INSANORVM sunt haec omnia ;  
 utrum vero a daemoniis, an vi morbi  
 provenerint, disceptatur. Id certum  
 est, Judaeorum animis iis tempori-  
 bus vulgo infedis opinionem, oc-  
 cupare saepe homines malos genios,  
 illosque miris modis excruciare, et  
 quasi furiis agitare. Neque enim a-  
 lius quisquam inter omnes, qui hu-  
 manum genus infestant, morbus tam  
 naturae vim excedere videtur ; ut-  
 pote qui commotionibus animi ef-  
 feratis, motibusque corporis validis-  
 simis simul et non voluntariis, mi-  
 serabiliter divexat. At nihil profe-  
 cto hic sacrum, nihil, quod ex male  
 affecta corporis sanitate oriri non

<sup>1</sup> Vid. <i>Matth. Cap.</i>		<sup>2</sup> <i>Marc. Capit. i. §</i>
viii. § 28. <i>Marc. Cap.</i>		23—26.
v. § 2. et <i>Luc. Cap.</i>		<sup>3</sup> <i>Luc. Capit. iv. §</i>
viii. § 27.		33—35.

possit,



possit, reperimus. Illud ut liquido pateat, de insania quaedam breviter dicenda sunt; non ea quidem, quae feбри acutae conjuncta est, illaque remittente definit, quam *φρενίτιδα* vocant, et brevis semper est; sed illa, quae corpori inhaeret, et morbum facit diuturnum.

EST igitur omnis insania laesae imaginationis morbus, qui a mente primum una aliqua in re nimis diu defixa originem trahit. Hinc enim sequuntur sollicitudines, et de futurorum eventu animi angores. Et quo majoris in vita momenti sint illa, in quibus imagines versantur, eo vehementius homines conturbant; ut in amore et religione fieri videmus, ubi spes, metus, desperatio, aliaeque contrariae animi commotiones, sibi invicem succedentes, diverse pertrahunt. Hoc ita se habere nemini dubium erit, qui insanientem saepe memoria constare;



res suas, nisi quatenus vanae species mentem percellunt, satis prudenter agere, quin et interdum etiam cum astutia quadam solito majori; depulsis denique medicamentorum vi imaginibus, sui compotem vitam transigere, animadverterit. In hac igitur aegritudine terrificae primum imagines hominem opprimunt, quas ira et furor anxietatem comitantes insequuntur; unde appropinquantibus dira omnia minatur et intentat, sibi etiam prae angore non raro manus inferens; subinde iterum moestus agit, et invicem se excipiunt rabies animique demissio; multoties vero, praesertim cum morbus fuerit diuturnus, in loca deserta et sola migrat procul ab hominum consuetudine,

*Ipse suum cor edens, hominum vestigia vitans<sup>1</sup>.*

<sup>1</sup> Cicero, *Tuscul. Disp.* | καλέδων, πόντον ἀνθρώπων  
*Lib. iii. 26. Qui ex illo* | ἀλεείνων. *Il. Z. v. 202.*  
*Homeri vertit, Ὀν θυμὸν* |

Qui



Qui morbo isto afficiuntur, vitam diutissime haud raro protrahunt. Omnibus enim insanis commune est, ut inedia, frigus, caeli inclementiam, quascunque denique noxas facillime sustineant, ultra quam facile credi possit, corporis robore pollentes. Saepe etiam evenit, ut post longum tempus dementiae superveniat epilepsia. Sunt enim affines hi morbi, neque in hoc casu spes ulla salutis affulget, ut usu compertum habemus. Denique observare oportet, prout corpus huic vel illi noxae magis sit opportunum; ita vel furiosi, vel melancholici, speciem praebere illum, qui hoc morbo laborat.

DAEMONIORVM autem ejectiones esse solummodo insaniae depulsiones multi ideo non credunt; quod ea, quae hominibus ita affectis contingunt, vi naturae fieri posse nequaquam videantur. At illi fane in re medica nimis hospites sunt; neque



que animum satis ad ea attende-  
runt, quae in aliis aegritudinibus  
non minus mirabilia quotidie occur-  
runt. Annon hominem pessundare  
vehementes animi affectiones saepe  
experimur? Subitus terror multos  
interemit, et ipsa quandoque supra  
modum exultans laetitia fuit exitio.  
Morbus periculosus ex una corporis  
sede in aliam ictu oculi citius inter-  
dum transit. A morfu canis rabidi  
venenum humoribus instillatum ali-  
quandiu delitescit; et post aliquot  
hebdomadas, interdum et menses,  
vim suam exerens, mala iis vix minus  
gravia progignit, quae daemones in-  
ferre perhibentur. Quid mirabilius  
iis, quae in graviditatibus non raro  
contingere videmus? Foemina in  
utero gestans, si forte quid appeti-  
verit, et frustra sit, interdum rei con-  
cupitae figuram quandam, aut simi-  
litudinem, in hac aut illa corporis  
parte, foetui suo imprimit. Imo,  
quod



quod majus est, et prodigii instar, subita partis alicujus laesione perterrita matre, ipsa illa pars in infante noxam sentit, et nutrimenti defectu marcescit. Scio hujusmodi omnes historias a medicis nonnullis, quoniam, qui talia fieri possint, haud percipiunt, in dubium vocari. At multa, quae ipse vidi, exempla mihi hac in re scrupulum omnem ademerunt. Tam stupenda autem est facultatis imaginandi vis, ut non minus falsae quam verae imagines afficiant, ubi mens iis assidue sit addicta. Id enim in mulieribus, quae sagae dicuntur, usu comperimus, quae consimili mentis errore captae, cum daemonibus non tantum consuetudinem habere, sed et pacta cum iis se inivisse, saepe imaginantur; idque animo adeo obstinato, ut etiam in judicium vocatae se facinorum, quae nunquam perpetraverint, reas confiteantur, cum ob ea ipsa jam  
mortis



mortis supplicium subiturae sint. Proinde omnibus notum est, quam mirabilibus modis in melancholicis mens perturbatur. Hic ex vitro caput sibi fictum putat, et, ne frangatur, foras prodire metuit. Ille se mortuum esse credit, et cum mortuis sine cibo debere versari. Talia sexcenta memorantur. Memini me novisse virum literatum, qui se in ventre infantem gestare affirmaret, de quo in lucem edendo valde sollicitus erat. Duos etiam vidi, qui, cum soli essent, voces sibi in aures loquentium audire putabant. Neque alia, ut opinor, conditio est illorum, qui larvas et spectra oculis cernere sibi persuadent. Sunt enim deliria quasi somnia vigilantium, et in utrisque pariter mens, pro natura specierum objectarum, diversimode corpus agitat.

QVAM diversis igitur modis laesiones imaginationis, ubi diu inhaerint,



ferint, hominem afficere, totumque calamitose admodum pervertere possint; ex iis, quae diximus, manifesto apparet. Nulla autem re tantum perturbari humanas mentes, quantum formidine, nemo ignorat; cujus causa est amor sui ipsius omnibus ingenitus. Quare cum, ut rectissime animadvertit Cicero, *Nulla gens tam fera, nemo omnium tam sit immanis, cujus mentem non imbuerit deorum opinio*<sup>1</sup>; nil mirum est, si homines scelerum conscii numinum timore percellerentur, quorum imperium in res omnes mundanas agnoscebant. Etenim ut bona omnia, et vitae beneficia, diis accepta referebantur; ita mala, et calamitates, in criminum poenam putabantur ab iis immitti. Idololatria autem, ut supra dixi<sup>2</sup>, apud Caldaeos ortum habuit, quae primum quidem in solis lunaeque cultu, deinde vero et in

<sup>1</sup> *Tusc. Quaest. Lib. i. 13.*<sup>2</sup> *Cap. i. p. 4.*



daemonum adoratione consistebat<sup>1</sup>. Hi autem ministri divini credebantur; et erant primitus animae heroum et magnorum virorum, qui ob collata in genus humanum aut patriam suam beneficia colebantur. Et a Chaldaeis quidem ad Phoenices, postea ad Aegyptios propagata, ad Graecos deinde, hinc ad Romanos, aliasque demum gentes temporis progressu daemoniaca ista religio pervenit.

JVDAEI autem, siquid miri faceret natura, ad angelorum supremi Dei ministrorum operam referre soliti, facile in animum sibi inducere poterant, ut diras quasdam crederent aegritudines, quae mentem simul et corpus laederent, et quarum causas cognoscere nequirent, ab angelorum malorum ἐνεργείαις exoriri. Discimus enim ex Philone Judaeo<sup>2</sup>,

<sup>1</sup> Vid. *Is. Newton. Chronolog. pag. 160.*

<sup>2</sup> *Lib. De gigantibus.*

cui



cui etiam consentit Fl. Iosephus, credidisse illos tam malos quam bonos esse angelos; bonos Dei ministeriis fungi erga homines, irreprehensibiles et beneficos; malos autem execrabiles, et modis omnibus noxios<sup>1</sup>. At illustrius hujus rei testimonium dari nequit narratione morbi, quo correptus est Saulus<sup>2</sup>, de quo superius egi<sup>3</sup>. Neque maniam tantum et epilepsin, sed et alios etiam morbos nonnullos ad daemonas pariter illi referebant. Ita cum Iesus hominem mutum furiosum liberaffet, ejecto daemónio, id fecisse dicitur<sup>4</sup>. Cumque alium furiosum, caecum, et mutum sanasset, calumniantes dixerunt Pharisaei, eum non nisi per Beelzebulem, daemoniorum principem, ejicere daemonia<sup>5</sup>. Et Christus ipse, cum mu-

<sup>1</sup> De bello Judaic. Lib. vii. Cap. 6.

<sup>2</sup> Vid. Regum Lib. i. Cap. xvi.

<sup>3</sup> Cap. iii. pag. 27.

<sup>4</sup> Matth. Cap. ix. v. 32.

<sup>5</sup> Matth. Cap. xii. v. 22.



*lierem quandam spiritum habentem debilitatis jam annos duodeviginti, eamque sic incurvam, ut se erigere non posset, ab illa infirmitate solvisset, more loquendi tum communi dicit, Satanam illam annos duodeviginti vinctam habuisse<sup>1</sup>.*

At non Judaeis tantum, sed et aliis etiam gentibus, in usu fuit infanos pro daemoniacis habere. Hinc apud Herodotum rex Cleomenes dicitur *non ab ullo daemone ad insaniam reductus, sed consuetudine cum Scythis ebriosus fuisse, et inde furiosus<sup>2</sup>*. Cumque δαίμονᾶν idem significet ac δαίμόνιον ἔχειν, hoc verbo pro *furere* utitur Xenophon<sup>3</sup>. Quin et Aristophanes de eodem morbo gravius urgente vocem κακοδαίμονᾶν usurpat, et deterrimum insaniae gradum non μανίαν, sed κακοδαίμονίαν

<sup>1</sup> Luc. Cap. xiii. § 16.

<sup>2</sup> Lib. vi. Cap. 84.

<sup>3</sup> Memorabil. Lib. i.



esse pronunciat<sup>1</sup>. Hinc etiam, ut notat Aretaeus, *sacer* apud illos dictus est hic morbus, *quoniam daemon aliquis in hominem ingressus esse putabatur*<sup>2</sup>. Medici igitur falsae isti opinioni fortiter obistere necesse habuerunt. Morbos enim a malis geniiis inferri creditos sacris ritibus et caerimoniis, non arte medica, depellendos esse vulgo persuasum fuit. Idcirco princeps medicorum Hippocrates, aut aliquis certe ex ejus discipulis, scripto perutili libello<sup>3</sup>, nullos morbos divinitus accidere docuit; magorum ac praestigiatorum loco habendos esse monens, qui talia in populum spargendo inscitiam suam specie sanctitatis obvelarent.

CAETERVM quod ad daemonum hanc in corpora humana potentiam,

<sup>1</sup> Vid. *Plutum, Aet.* | *ἡ ἐς τὸν ἀνθρώπου εἰσόδος.*  
 ii. *Scen.* 3. § 38. et *De causis morbi diu-*  
*Aet.* ii. *Scen.* 5. § 15. | *turn. Lib. i. Cap. 4.*

<sup>2</sup> Διὰ τῆς δόξης δαίμο-

<sup>3</sup> De morbo sacro.



a Judaeis pariter ac aliis gentibus creditam, spectat, vim divinam in morbis inferendis, ubi causas naturales habere possint, ad partes trahi non debere, nisi diserte denuncietur eos divinitus immitti, jam antea dixi<sup>1</sup>. Nulli enim, quibus miseri mortales cruciantur, tam miri sunt et visu terribiles, quin ex corporis male affecti vitiis ortum habeant. Proinde Deus ipse, si velit, tam causarum naturalium, quam bonorum angelorum, virtute ad mala cujuscunque generis hominibus infligenda uti potest. Et nemo, opinor, existimabit daemonibus concessum esse, ut homines pro libitu suo furiis exagitent. Sed plura de hac re dicere eo minus necessarium videtur, quod duo apud nos doctissimi theologi tam plene et copiose illam jam antea tractaverint<sup>2</sup>.

<sup>1</sup> Cap. iii. pag. 27.

<sup>2</sup> Vid. *Works of Jos. Mede*, edit. 1677. Dis-  
 course vi. et *Enquiry into the meaning of Demoniacs, etc.*



UT finem igitur morbis his daemoniacis imponam, quibus modis eos tractare oporteat, nunc breviter ostendam. Et illud quidem ante omnia est agendum, ut mens cogitationibus iis, quae antea occupaverant, contrariis exerceatur; aliae enim imagines aliis locum cedunt, et, mutatione facta, animus ab eo statu, in quo fuerat, abducitur; ad quod non satis attendunt plerique medici. Ubi id fieri potest, prompte interdum succurritur. Cum autem propter moram diuturnam, quam traxit aegritudo, aut aliam aliquam ob causam, hoc non conceditur; idearum saltem, quae in praesentia sollicitant, vis omnibus modis minui ac frangi debet. Quorundam vani metus sunt levandi, tristesque cogitationes discutiendae. Aliorum vero audacia est coercenda, in quem finem objurgationibus et minis haud raro opus est. Subiti  
etiam



etiam terrores, qui mentem diverso modo, quam quo agitata est, vehementer perturbent, pro tempore saltem interdum profuerunt. Veteres tormenta quaedam, ut vincula et plagas, praecipiebant<sup>1</sup>. Et vincire quidem eos interdum oportet, qui violentius se gerunt, ne vel sibi vel alteri noceant. Tormenta vero et plagae ideo minus sunt necessaria, quod animi tam pusilli, et imbelles sunt omnes insani; ut etiam acerrime furentes, semel aut iterum vincti, quasi victi se dedant, et in posterum meticulosi ab injuriis inferendis desistant.

Ad medicinam quod attinet, humores corporis crassi attenuari, et spirituum animalium motus inordinati compesci debent. Sanguinis igitur detractionibus, vomitionibus, purgationibus, vesicatoriis, et fetaceis

<sup>1</sup> Vid. *Celsum*, *Lib. iii. Cap. xviii.*

dictis,



dictis, capitis interdum refrigerationibus, uti oportet. His adjungenda sunt ea gummi, quae foetido odore nares feriunt; in primis vero *asa foetida*, *myrrha*, et *galbanum*. Neque raro *camphora* in efferatis ultra modum motibus, et vigiliis, auxilio fuit. Plus autem prodest, praesertim si calor febrilis urgeat, *nitrum*, quantum stomachus ferre poterit, frequenter adhibitum. Victu denique tenui, et corporis exercitiis, pugnandum est. Ea vero moderatio in omnibus exinanitionibus tenenda est, ut ne in morbum, quem, insaniae contrarium, *cardiacum* dixere veteres<sup>1</sup>, hoc est, corporis imbecillitatem, incidat aeger. Id enim cum fit, resolutis viribus, nullus deinceps medicinae locus est; sed homo in perpetuum moestus vitam protrahit, heu! nimis plerumque longam.

<sup>1</sup> *Cels. Lib. iii. Cap. xix.*





## CAPVT X.

## De lunaticis.

**V**T medici quidam veteres morbum comitiam ad divinam quandam potentiam, ita insaniam ad lunae vim retulerunt. Lunaticus tamen, hoc est, σεληνιαζόμενος, cujus morbus in Evangeliiis describitur, morbo comitiali afficiebatur<sup>r</sup>. Is igitur (nam unus tantum disertim memoratur) aut insanus simul erat et epilepticus, quod non raro fit; aut epilepsia ad lunae circuitus revertente, quod frequentissimum est, laborabat. Breviter enim de eo narratur, quod *saepe in ignem, saepe in aquam cadebat*. In hac autem aegritudine homo subito concidit, et quasi mortuus aliquandiu jacet;

<sup>r</sup> *Matth. Cap. xvii. § 15 et 18.*

aut



aut distentis totius corporis nervis, oculis distortis, motisque ex ore spumis, agitur. Tempore vero interposito ad se redit, mali, quod passus fuit, ne minimum quidem sentiens, perinde ac si nihil sibi accidisset. Sed enim *Jesus increpuisse daemonium* dicitur, *quod exiit, et puer sanatus est*. Clarius autem epilepsiam passum fuisse hunc puerum ex eadem historia, ab evangelista medico depicta, apparet; qui *aegrum, simul ac corripuit spiritus, clamare, spumasque agentem lacerari et dilaniari*, tradit<sup>1</sup>.

CAETERVM quod ad illos spectat *σεληνιαζομένους*, quos cum daemoniacis conjunctos, quasi morbo diverso laborantes, Jesus etiam sanasse dicitur<sup>2</sup>; ii aut insani erant, aut insani simul et epileptici, quod, ut modo diximus, non raro contingit. De

<sup>1</sup> *Luc. Cap. ix. § 39, et seqq.*

<sup>2</sup> *Matth. Cap. iv. § 24.*



daemoniis autem jam fatis dictum est. Ad lunam vero quod attinet, minime dubium est, quin accessus ejusmodi, ad certa mensis tempora recurrentes, homines impulerint, ut lunarem esse hanc aegritudinem crederent. Revera enim tantam virtutem in eo morbo habet hoc astrum, ut saepe non alio tempore, quam nova vel plena luna, homines illo corripiantur; planeta nimirum vim suam iis causis adjiciente, quae ad noxam hanc inferendam sunt aptae. Id autem qua fiat ratione, alias explicui; ubi aetherem nostrum, pariter ac mare in aestus suos, iisdem vicibus intumescere manifestum ostendi<sup>1</sup>.

ET causas quidem naturales habere, minimeque divinum esse hunc morbum, jam olim docuit magnus Hippocrates<sup>2</sup>. Quanquam enim illis

<sup>1</sup> Vid. *Lib. De imperio* | <sup>2</sup> *Lib. De morbo sa-*  
*solis et lunae, Cap. i et ii.* | *cro.*



temporibus nondum satis patefactae essent animalis corporis sedes interiores, neque bene perspectae sanguinis et humorum, liquoris praefertim, quem nervi ferunt, proprietates; sagaci tamen ingenio et usu instructus plurima, tam ad naturam gravis hujusce mali cognoscendam, quam ad ejus sanationem pertinentia, recte proposuit. Hanc enim aegritudinem in cerebro ab humorum copia oriri, sapientissimus ille senex monstravit; ideoque sine incantamentis et magicis artibus, quae ad eam depellendam tunc in usu erant, illa, quae exsiccant, et exuperantem materiam minuunt, in primis ei mederi docuit.

POSTQVAM autem saeculis frequentibus crebrior medicamentorum usus invaluerat, plurima contra terribilem hunc morbum excogitata sunt remedia, et nonnulla quidem  
foeda



foeda nimis et horrida; qualia sunt jugulati gladiatoris epotus calidus sanguis, carnes humanae vel equinae, animalium quorundam testes et veretra, aliaque his similia<sup>1</sup>; quasi, quae naturae sunt adversa, tanto ejus vitio contraria esse debeant. Ita enim saepe fit, ut, ubi deest rationalis medicina, inepta quaevis et temeraria tentetur. At circumforaneis tantum medicis, et aniculis, istiusmodi experimenta conveniunt. Quanquam ne nostris quidem temporibus a sordibus in hisce casibus ars nostra satis abhorere videtur; cum stercore adhuc avium quarundam, et ungulae quadrupedum, aegrotis saepe devoranda praebeantur. Mirari autem subit, cum chemia jam ex corporibus falsa et principia sua maxime actu-

<sup>1</sup> Vid. *Cels. Lib. iii.* | *Aurelian. Lib. i. Cap.*  
*Cap. xxiii.* et *Caek.* | 4.



osa elicere docuit; cur pura haec potius in usum adhibere, quam crassam simul et faeculentam, cui inhaerent, materiam, stomacho semper ingratam, nonnunquam et noxiam, in os ingerere medici nolint. At majora his auxilia expetit difficillimus iste morbus, nec eadem ubique, sed pro temperamentorum corporis diversitate alia atque alia. Ea autem, quae plerunque conferunt, breviter hic tradam.

SANGVIS, prout vires ferent, iteratis vicibus mittendus est, quo impetus ejus coercetur. Vomitu interdum, purgatione per alvum crebrius, uti decet. In primis autem superantem materiam a capite subtrahere oportet, quod praestant *emplastra vesicatoria*. Commodius vero idem fiet, si cutis medicamento caustico prope occipitium ita aduratur, ut per fonticulum perniciosus humor assidue prorumpat.

ET



ET haec quidem accessuum vim frangunt; ad ipsam vero causam tollendam, ubi id fieri potest (non enim semper conceditur) alia praesidia requiruntur. Hanc enim in humore isto, qui nervos corporis irrigat, quem spiritus animales vulgo appellant, sedem praecipuam habere manifestum est. Quibus autem modis in hujusmodi aegritudinibus is afficiatur, investigare irritus, ut opinor, foret labor. Sed enim cum, ut alias docui<sup>1</sup>, ex partibus constet tenuissimis, quae ex sanguine in cerebrum derivantur, magnamque elasticae istius materiae, per orbem universum diffusae, portionem in se recipiunt, et implicitam tenent; quin corporis vel animi quodam vitio ita corrumpatur, ut officiis vitae exequendis jam minus idoneus, motus animales omnes non ad imperium voluntatis, sed effraenato quo-

<sup>1</sup> *Account of poisons, third ed. the Introduction.*  
dam



dam impetu et inordinato peragat, nequit sane dubitari. Remedia autem, quae pravae huic spirituum animalium conditioni emendandae conducunt, ea sunt praecipua, quae humores attenuandi, et per sudores e corpore propellendi, vi maxima pollent. Haec inter excellunt *radix valerianae sylvestris*, *castoreum Rufficum*, *gummi graveolentia*, et *cinna- baris nativa*, non parce, sed larga satis copia, quotidie assumpta; ita tamen, ut medicamenti purgantis usus aliquando iis interponatur, ex quibus haud aliud praestantius est antidoto *hiera picra*, facta nimirum ex hac, vino affuso, tinctura. Celebratum enim a longo tempore *viscum quercinum* inutile lignum esse, jamdudum experientia compertum habeo. Neque id mirum, cum gustatu vel odoratu vix quicquam virtutis in eo deprehendatur, et Druidarum veterum religioni commen-

N

dationis



dationis suae originem unice debeat. Quocirca inter frivolas res istas numerari oportet, quas vana superstitio in artem medendi invenxit; nisi forte falcem auream, qua demetebatur, candidam sacerdotis vestem, taurorum candidi coloris sacrificia, et alia id genus inania, ad sanandum conferre aliquid, sibi quis persuasum habeat<sup>1</sup>.

<sup>1</sup> *Plin. Hist. Nat. Lib. xvi. § ult.*







C A P V T XI.

*Sanguinis muliebris profluvium.*

**M**EMORAT Divus Matthaeus,  
“ Christum mulierem quan-  
“ dam, quae sanguinis profluvio  
“ duodecimum laborabat annum,  
“ verbo suo sanasse <sup>1</sup>. ”

QVAERITVR itaque, cujusmodi  
foret iste morbus. Cum dicitur au-  
tem γυνή αιμορροῖσα, sanguinis flu-  
xum ex partibus naturalibus fuisse  
opinor, quem ῥόον αιμαλώδη appellat  
Hippocrates <sup>2</sup>, et longum necessario  
esse observat. Unde duodecim jam  
annos misella haec eo laborans, nulla  
arte sanabilis jure censeretur poterat.

<sup>1</sup> Cap. ix. § 20.    <sup>2</sup> De morb. Lib. i. Sect. 3.





## CAPVT XII.

*Debilitas dorsi cum spina rigida.*

“ **E** RAT mulier quaedam spiri-  
 “ tum habens debilitatis  
 “ jam annos duodeviginti, eaque sic  
 “ incurva, ut se erigere prorsus non  
 “ posset; cui manus imposuit Jesus,  
 “ et soluta est ab infirmitate, atque  
 “ protinus correct<sup>1</sup>. ”

Συγκύπτουσα erat haec mulier, five  
*cernua*; non valens ἀνακύψαι, five  
*caput attollere*. Spiritus autem iste,  
 pro more loquendi Judaeis usitato,  
 erat ipse *Satanas*. Nam ita mox ad  
 collegii magistrum, indignantem il-  
 lam sabbato sanatam esse, Christus  
 ipse loquens ait, *hanc Satanam an-*  
*nos jam duodeviginti vinctam habu-*

<sup>1</sup> Luc. Cap. xiii. v. 11, et seqq.

*isse.*



*isse.* Et eodem plane sensu πνεῦμα ἄλλαν vocat Marcus evangelista *spiritum, qui loquendi facultatem impediret*<sup>1</sup>.

Hoc malum saepe iis contingit, quibus lumborum vitio nimis diu vexatis musculorum fibrae illic contrahuntur, et rigidae fiunt. Verisimile est igitur ab hac ipsa causa diuturnum hunc morbum, non alia quam divina ope sanabilem, provenisse.

<sup>1</sup> Cap. ix. § 17.







## CAPUT XIII.

*Christi sanguineus sudor.*

**D**E Christo ipso narrat Divus Lucas, quod, “cum esset in aestu contentius orans, sudore manabat simili sanguineis guttis ad terram delabentibus<sup>1</sup>.”

Hoc vulgo ita accipitur, ut si ipso sanguine sudasset Servator mundi. Id autem non dicitur. Erat solummodo sudor ὡσεὶ θρόμβοι αἱμάτων, *sicut sanguinis guttae*; hoc est, guttae sudoris adeo magnae erant, crassae, ac viscidae, ut instar guttarum sanguinis caderent in terram. Ita verba haec intellexerunt Justinus Martyr, Theophylactus, et Euthymius. Observavit tamen Galenus,

<sup>1</sup> Cap. xxii. v. 44.



*Christi sanguineus sudor.* 95

*Contingere interdum, poros ex multo  
aut fervido spiritu usque adeo dila-  
tari, ut etiam exeat sanguis per eos,  
fiatque sudor sanguineus<sup>1</sup>.*

<sup>1</sup> *Lib. De utilitate respirationis.*



CAPVT





## CAPVT XIV.

## Morbus Judae.

**I**NTER morbos refero nefarii proditoris Christi, Judae scilicet, mortem; de qua eo libentius aliquid dicam, quoniam in diversas super illa sententias abierunt etiam doctissimi sacrarum literarum interpretes. Et quinquaginta circiter abhinc annis duo in academia Lugdunobatava celeberrimi historiarum professores, Jacobus Gronovius et Jacobus Perizonius, nimia cum iracundia, editis libellis, controversiam hanc agitarunt. Non enim semper et usquequaque cultores suos humanos reddunt literae humaniores.

LIS illa hinc orta est. Ediderat Perizonius *Aeliani varias historias* cum notis suis et aliorum, ubi arrepta



repta occasione ab eo, quod de Poliaagro tradit Aelianus<sup>1</sup>, significationem verbi ἀπάσχεσθαι, quo mortem Judae commemorans utitur Divus Matthaeus<sup>2</sup>, diligenter excutit; eamque vocem non tantum strangulationem, quae laqueo fit, sed etiam summum animi dolorem, quo quis ad mortem fere premitur, et quo confecti necem sibi saepe consciscunt, nonnunquam denotare contendit. Hoc aegre ferens Gronovius, qui jam ante libellum *De morte Judae* vulgaverat, quo hominem miserimum suspendio voluntario vitam suam finivisse dixerat, stylum mox strinxit, adversarii rationes convellens, suasque confirmans. Quia et de locutione περηνῆς γεγόμενος a Perizonio dissentit, quam non de moriente, sed de jam mortuo tantum, sive de projecto cadavere, intelligi debere fidenter asserit. Divus enim

<sup>1</sup> *Lib. v. Cap. 8.*

<sup>2</sup> *Cap. xxvii. v. 5.*



Matthaeus simpliciter dicit ἀπήγ-  
 ζαλο<sup>1</sup>; Lucas autem plenius, πρηνὴς  
 γενόμενος ἐλάκησε μέσος, καὶ ἐξεχύθη  
 πάντα τὰ σπλάγχνα αὐτοῦ<sup>2</sup>, hoc est,  
*praeceps factus crepuit medius, et ef-*  
*fusa sunt ejus omnia viscera.* Satis  
 igitur liquet, si verbum ἀπάσχεσθαι  
 non aliud significet quam *strangu-*  
*lationem, quae laqueo fit,* minime  
 secum concordare duos evangeli-  
 stas; nisi cum doctissimo Casaubono  
 dicere velimus, Judam se suspendisse,  
 sed, laqueo rupto, decidisse in prae-  
 ceptis. At hoc non mortis modum  
 exponit, id quod manifeste videtur  
 voluisse Divus Lucas; sed rem tan-  
 tum levis momenti adjicit, quae  
 post illam, aut certe in illa acciderat.  
 Manifestum est autem per vocem  
 hanc non tantum *suffocationem sus-*  
*pendio factam* denotari, sed etiam  
*summum animi dolorem,* quo vehe-  
 menter oppressi mortem sibi haud

<sup>1</sup> Ibid.      <sup>2</sup> Act. Apost. Cap. i. v. 18.



raro consciscunt. *Strangulat* enim, ut ait Ovidius, *inclusus dolor*. Et hoc quidem quamplurimis exemplis, ex auctoribus antiquis allatis, liquido demonstravit Perizonius<sup>1</sup>. Neque minus dubium est, quin locutio ista *πρηνὴς γενόμενος*, tam de illo, qui *sponte sua se praecipitem dat*, quam qui *casu aliquo pronus decedit*, adhiberi possit; id quod idem ille prolixè ostendit.

NON una dissertatione stetit illa rixa. Expenfis autem argumentorum, quae ab utraque parte prolata sunt, ponderibus, quod dixit Matthaeus cum eis, quae Lucas, aut apud eum Divus Petrus, exposuit, hoc pacto conciliari posse existimo. Proditor iste miserrimus, postquam Christum morti damnatum vidit, facti sui poenitentiam agere coepit;

<sup>1</sup> Vid. *Dissert. De morte Judae*, et *Responsiones* | *duas ad Gronovium, Lugd. Bat. 1702 et 3.*



hinc mox moerore animique desperatione correptus, aut vertigine captus (quod in ejusmodi aegritudine saepe evenit) ex alto cecidit pronus; aut, quod probabilius videtur, ultro se praecipitavit, et illiso forte ad saxum aliquod, vel arboris truncum, corpore, effusis visceribus, mortuus jacuit. Matthaeus itaque animi angorem, qui ipsum ad mortem sibi inferendam adegerat, declaravit; Lucas vero diserte ac proprie necis illius modum definivit. Non immerito igitur hoc mortis genus in numero morborum (aegrotabat enim animus) cenferi debet.







## CAPUT XV.

*Regis Herodis morbus.*

**I**NSIGNIS est morbus, quo justo Dei judicio in poenam superbiae correptus Herodes Agrippa expirasse dicitur. Is enim *Χωληρόβρωτος*, hoc est, *a vermibus erofus*, miseram vitam finivit, ut sacer tradit historicus, cujus verba sic se habent: “ Certo die Herodes regali  
 “ veste indutus, in solio sedens, ad  
 “ illos orationem habebat; et po-  
 “ pulus divinam esse, non humanam  
 “ vocem acclamabat. Ille vero con-  
 “ festim a Domini angelo ictus  
 “ (quod Deo gloriam non tribuisset)  
 “ et a vermibus erofus expiravit<sup>1</sup>. ”  
 At Josephus eandem rem narrans *vermes* non memorat; sed tormi-  
 nibus maximis subito correptum,

<sup>1</sup> *Act. Apost. Cap. xii. v. 23.*



continuisque per quinque dies ventris cruciatibus confectum, periisse scribit<sup>1</sup>. Vermes autem, a quibus viscera erodebantur, torminum fuisse causam Divus Lucas nos docuit.

ILLUD igitur singulare in se habuit regis hujusce morbus, quod repente ipsi divinitus fuit immissus (idque illum agnovisse testatur Josephus<sup>2</sup>) caeteroquin alia non desunt verminosi putroris in vivis exempla. Hoc enim morbo avus ejus Herodes, Magni cognomine insignitus, diu laborasse, tandemque consumptus fuisse dicitur<sup>3</sup>. Herodotus etiam de Phertima, Arcesilai Cyrenensium regis matre, meminit, quod vivens verminibus computruerit<sup>4</sup>. Atque eodem

<sup>1</sup> *Antiq. Jud. Lib. xix. Cap. viii. § 2.*

<sup>2</sup> *Ubi supra.*

<sup>3</sup> *Joseph. A. J. Lib. xvii. Cap. vi. § 5. et*

*De B. J. Lib. i. Cap. xxxiii. § 5.*

<sup>4</sup> *Hist. Lib. iv. in fine,*

*Ζῶσα δ' αὐτῶν ἐξέχεσε.*



foedo morbo, exesis genitalibus, periisse traditur imperator Romanorum, Galerius Maximianus<sup>1</sup>. Funestos igitur hujusmodi casus non observasse aliqui saltem ex medicis Graecis non poterant. Idcirco ad ulcera *Χώληκας ἔχοντα*, h. e. *vermibus scatentia*, remedia proposuit Galenus<sup>2</sup>. *In abscessibus enim, inquit, multoties inveniantur animalia, ζῶα, illis, quae ex putredine generantur, simillima*<sup>3</sup>. Et Philoxenus apud Aetium se aliquando *reperisse* dicit *in atheromatum humore animalia, culicibus, aut muscis parvis, similia*<sup>4</sup>. Denique Paulus Aegineta haec pellendi etiam rationem docet<sup>5</sup>.

PLURA autem veterum testimonia in re satis manifesta adducere

<sup>1</sup> Sext. Aurel. Victor.	per genera, L. iv. Cap. 10.
Epitom. et Pompon.	<sup>3</sup> Lib. De tumorib. prae-
Laeti Rom. Hist. com-	ter natur. Cap. 4.
pend.	<sup>4</sup> Lib. xv. Cap. 7.
<sup>2</sup> De compos. medic.	<sup>5</sup> Lib. iv. Cap. 42.



non est necesse, cum recentiores etiam medici complures haec eadem observarunt. Marcellus enim Donatus virum quendam illustrissimum memorat, cujus ventrem obfissimum ad mortem usque eroserunt, atque corruerunt, in cute, pinguedine et humoribus ultra modum distenta, nati vermiculi, iis haud dissimiles, quos in corrupto vetustate caseo occultari videmus<sup>1</sup>. Simillima his animalcula, simul cum urina ex corpore medici cujusdam eximii exeuntia, vidit Nicolaus Tulpius, vir non minus arte quam doctrina insignis<sup>2</sup>. Doctissimi etiam *Ephemeridum medicophysicarum Germanicarum* scriptores atrocem nobilis cujusdam Galli casum enarrant, cui ex corrupto sanguine dies noctesque cum horrendis cruciatibus, per universos fere cutis meatus, ocu-

<sup>1</sup> *De hist. medic. mirab.*  
*Lib. i. Cap. 5.*

<sup>2</sup> *Observ. medic. Lib.*  
*ii. Cap. 50.*



los nimirum, nares, os, et vesicam urinae, minutissima rufi coloris animalcula eruperunt, quorum carnificina miserrime periit<sup>1</sup>. Apud eodem quoque ex abscessu in fura puellae orto vermes nigri, scarabaeis haud absimiles, prorepisse memorantur<sup>2</sup>. Ex mammis denique puerperae minutissimos et candidissimos vermiculos cum lacte exivisse iidem auctores testantur<sup>3</sup>. Nec omitteri hic debent duae confimiles narrationes, quarum alteram Poterius, alteram, qui scripta ejus illustravit commentario, tradidit Fredericus Hoffmannus. Ille colonum curabat, cui ex aperto in genu dextro tumore vermes exiles vivi prodierunt, qui morfibus suis dolorem atrocissimum hac in parte concitarunt. Hic autem artificem quen-

<sup>1</sup> *Decur. 2. ann. 5.*  
*Append. Artic. 38.*

<sup>2</sup> *Ibid. Artic. 52.*

<sup>3</sup> *Ibid. Artic. 109.*



dam vidit, quem cum tumor durus, magnam afferens molestiam, circa venas ani exortus infestaret, hunc iterum atque iterum scalpello chirurgus nullo cum levamine incidit; donec tandem ex ulcere facto vermiculos nigros, aculeis instructos, magna copia foras exemisset<sup>1</sup>.

HISTORIIS istis, licet mirae videantur, non est tamen cur quis fidem deneget. Animata est enim, supra quam credi facile possit, omnis rerum natura. Aër, quem spiramus; cibi, quibus vescimur; liquida potissimum omnia, diversissimi generis animalculis abundant. Ex quibus fieri potest, ut nonnulla corporibus nostris recepta, et in exiguos partium mollissimarum meatus, veluti in nidos, delata, more lumbricorum in intestinis, crescant,

<sup>1</sup>*Poterii Opera cum an-* | *edita Francof. 1698,*  
*notat. Frid. Hoffmanni,* | *pag. 72.*



et magnitudinem eorum acquirant. Hinc, obstructis minimis humorum canaliculis, tumores oriuntur; qui calore suppurati et rupti foedam prolem inclusam, vermiculorum specie, effundunt.

NEQVAQVAM igitur interpretibus accedo, qui phthiriasi, hoc est, *morbo pediculari*, consumptum interiisse Herodem autumant. Aliud animal est *Κλώληξ*, aliud *φθειρ*; haec summam cutem, ille corporis interiora depascitur. Neque dubium esse potest, quin Divus Lucas, et ipse medicus, vim utriusque vocis recte intellexerit. Scio tamen morbum ὑπὸ τῶν φθειρῶν, cum eo ὑπὸ τῶν Κωλήκων oriundo, a viris doctissimis confundi; quorum illo periisse dicitur Pherecydes Syrius<sup>1</sup>, ut etiam Lucius Sylla<sup>2</sup>. Unde erudi-

<sup>1</sup> *Aelian. Var. Hist. Lib. iv. Cap. 28.* | <sup>2</sup> *Plutarch. in ejus vita.*



tissimus Kühnius<sup>1</sup>, *tantundem*, inquit, *michi valet apud S. Lucam* *Χω-  
ληκόβρωτος*, *ac apud Hesychium*<sup>2</sup> *φθει-  
ρόβρωτος*: ideo nimirum, quod pedi-  
culi veri sint vermes.

<sup>1</sup> *Not. ad Aelianum.*    <sup>2</sup> *Lib. De vit. philos.*

F I N I S.









THE  
LIBRARY OF THE  
MUSEUM OF NATURAL HISTORY  
AND  
ZOOLOGY  
OF THE  
CITY OF LONDON  
1881

P. 1. N. 1. 8

